

四庫全書

集部

欽定四庫全書

文章辨體彙選卷七百四十四

明 賀復徵 編

弔文一

劉勰曰弔者至也詩云神之弔矣言神至也君子令終定謚事極理哀故賓之慰主以至到為言也

弔屈原文

漢賈誼

誼為長沙王太傅既以謫去意不自得及渡湘水為賦

以弔屈原屈原楚賢臣也被讒放逐作離騷賦其終篇  
曰已矣哉國無人兮莫我知也遂自投汨羅而死誼追  
傷之因自喻其辭曰

恭承嘉惠兮俟罪長沙側聞屈原兮自沈汨羅造託湘  
流兮敬弔先生遭世罔極兮乃隕厥身嗚呼哀哉逢時  
不祥鸞鳳伏竄兮鴟梟翱翔闖茸尊顯兮讒諛得志聖  
賢逆曳兮方正倒植世謂隨夷為溷兮謂跖蹻為廉莫  
邪為鈍兮鉛刀為銛吁嗟默默生之無故兮幹棄周鼎

寶康瓠兮騰駕罷牛驂蹇驢兮驥垂兩耳服鹽車兮章  
甫薦履漸不可久兮嗟苦先生獨離此咎兮訊曰已矣  
國其莫我知兮獨壹鬱其誰語鳳漂漂其高逝兮固自  
引而遠去襲九淵之神龍兮沕深潛以自珍偁獮獪以  
隱處兮夫豈從蝦與蛭螾所貴聖人之神德兮遠濁世  
而自藏使騏驥可得係而羈兮豈云異夫犬羊般紛紛  
其離此尤兮亦夫子之故也厯九州而相其君兮何必  
懷此都也鳳皇翔於千仞兮覽德輝而下之見細德之

險徵兮遙增擊而去之彼尋常之汙瀆兮豈能容夫吞  
舟之巨魚橫江湖之鱣鯨兮固將制於螻蟻

弔夷齊文

魏王粲

歲旻秋之仲月從王師以南征濟河津而長驅踰芒阜  
之崢嶸覽首陽於東隅見孤竹之遺靈心於悵而感懷  
意惆悵而不平望壇宇而遙涕抑悲古之幽情知養老  
之可歸忘除暴之為仁絜已躬以騁志愆聖哲之大倫  
忘舊惡而希古退採薇以窮居守聖人之清槩要既死

而不渝厲清風於貪士立果志於懦夫到於今而見稱  
為作者之表符雖不同於大道令尼父之所譽

弔孟嘗君文

晉潘岳

人罔貴賤士無真偽延入如歸望賓若企出握秦機入  
專齊政右眄而羸強左顧而田競且以造化為水天地  
為舟樂則齊喜哀則同憂豈區區之國而大邦是謀瑣  
瑣之身而名利是求畏首畏尾東奔西囚志撓於木偶  
命縣于狐裘

弔魏武帝文

陸機

元康八年機始以臺郎出補著作游乎秘閣而見魏武帝遺令慨然嘆息傷懷者久之客曰夫始終者萬物之大歸死生者性命之區域是以臨喪殯而後悲覩陳根而絕哭今乃傷心百年之際興哀無情之地意者無乃知哀之可有而未識情之可無乎機答之曰夫日蝕由乎交分山崩起于朽壤亦云數而已矣然百姓怪焉者豈不以資高明之質而不免卑濁之累居常安之勢而終

嬰傾離之患故乎夫以迴天倒日之力而不能振形骸之內濟世夷難之智而受困魏闕之下已而格乎上下者藏于區區之木光于四表者翳乎蕞爾之土雄心摧于弱情壯圖終于哀志長算屈于短日遠跡頓于促路嗚呼豈特瞽史之異闕景黔黎之怪頽岸乎觀其所以顧命冢嗣貽謀四子經國之畧既遠隆家之訓亦弘又云吾在軍中持法是也至于小忿怒大過失不當效也善乎達人之謙言矣持姬女而指季豹以示四子曰以累



汝因泣下傷哉曩以天下自任今以愛子託人同乎盡  
者無餘而得乎亡者無存然而婉孌房閨之內綢繆家  
人之務則幾乎密與又曰吾媿好妓人皆著銅雀臺於  
臺堂上施八尺牀總帳朝晡上脯糒之屬月朔十五日  
輒向帳作伎汝等時時登銅雀臺望吾西陵墓田又云  
餘香可分與諸夫人諸舍中無所為學作履組賣也吾  
歷官所得綬皆著藏中吾餘衣裘可別為一藏不能者  
兄弟可共分之既而竟分焉亡者可以勿求存者可以

勿違求與違不其兩傷乎悲夫愛有大而必失惡有甚而必得智慧不能去其惡威力不能全其愛故前識所不用心而聖人罕言焉若乃繫情累於外物留曲念於閨房亦賢俊之所宜廢乎於是遂憤懣而獻弔云爾接皇漢之末緒值王塗之多違佇重淵以育麟撫慶雲而遐飛運神道以載德乘靈風而扇威推羣雄而電擊舉勅敵其如遺指八極以遠畧必翦焉而後綏釐三才之闕典啟天地之禁聞舉修網之絕紀紐大音之解徽

掃雲物以貞觀要萬塗而來歸丕大德以宏覆援日月而齊暉濟元功於九有固舉世之所推彼人事之大造夫何往而不臻將覆簣於浚谷擠為山乎九天苟理窮而性盡豈長算之所研悟臨川之有悲固梁木其必顛當建安之三八實大命之所艱雖光昭於曩載將稅駕於此年惟降神之綿邈眇千載而遠期信斯武之未喪膺靈符而在茲雖龍飛於文昌非王心之所怡憤西夏以鞠旅泝秦川而舉旗踰鎬京而不豫臨渭濱而有疑

冀翌日之云膠彌四旬而成災詠歸塗以反旆登峻澠  
而竭來次洛汭而大漸指六軍曰念哉伊君王之赫奕  
實終古之所難威先天而蓋世力盪海而拔山厄奚險  
而弗濟敵何強而不殘每因禍以禔福亦踐危而必安  
迄在茲而蒙昧慮噤閉而無端委軀命以待難痛沒世  
而永言撫四子以深念循膚體而頽歎迨營魄之未離  
假餘息乎音翰執姬女以嘔瘁指季豹而淮焉氣衝襟  
以嗚咽涕垂睫而汎瀾違率土以靜寐戢彌天乎一棺

咨宏度之峻邈壯大業之允昌思居終而恤始命臨沒而肇揚援貞吝以憇悔雖在我而不臧惜內顧之纏綿恨末命之微詳紆廣念于履組塵清慮於餘香結遺情於婉孌何命促而意長陳法服於帷座陪窈窕於玉房宣備物於虛器發哀音於舊倡矯感容以赴節掩零淚而薦觴物無微而不存體無慧而不亡庶聖靈之響像想幽神之復光苟形聲之翳沒雖音景其必藏徽清絃而獨奏進脯糒而誰嘗悼總帳之冥漠怨西陵之茫茫

登雀臺而羣悲貯美目其何望既晞古以遺累信簡禮而薄塋彼裘紱於何有貽塵謗於後王嗟大戀之所存故雖哲而不忘覽遺籍以慷慨獻茲文而悽傷

弔賈誼文

庾闡

中興二十三載余忝守衡南鼓棹三江路次巴陵望君山而過洞庭涉湘川而觀汨水臨賈生投書之川慨以永懷矣及造長沙觀其遺象喟然有感乃弔之云

偉哉蘭生而芳玉產而潔陽葩熙水寒松負雪莫邪挺

鏐天驥汗血苟云其儁誰與比傑是以高明倬茂獨發  
奇秀道率天真不議世疾煥乎若望舒耀景而焯羣星  
矯乎若翔鸞拊翼而逸宇宙也飛榮洛汭擢潁山東質  
清浮磬聲若孤桐琅琅其璞巖巖其峯信道居正而以  
天下為公方駕逸步不以曲路期通是以張高弦悲聲  
激柱落清唱未和而桑濮代作雖有惠音莫過韶濩雖  
有騰鱗終仆一壑嗚呼大庭既邈玄風悠緬皇道不以  
智隆上德不以仁顯三五親譽其軌可仰而標霸功雖

逸其塗可翼而聞悲矣先生何命之蹇懷寶如玉而生  
運之淺昔咎繇謨虞呂尚歸昌德協充符乃應帝王夷  
吾相桓漢登蕭張草廬三顧臭若蘭房是以道隱則蠖  
屈數感則鳳覩若棲不擇木翔非九五雖曰玉折儁才  
可補夫心非死灰智必存形形託神川故能全生奈何  
蘭膏揚芳漢庭摧景颺風獨喪厥明悠悠太素存亡一  
指道來斯通世往斯圯吾哀其生未見其死敢不敬弔  
寄之淥水



弔莊周文

嵇含

帝堦王弘遠華池豐屋廣延賢彥圖莊生垂綸之象記  
先達辭聘之事畫真人於刻桷之室載退士於進趣之  
堂可謂托非其所可弔不可讚也其辭曰

邁矣莊周天縱特放大塊授其生自然資其量器虛神  
清窮玄極曠人偽俗季貞風既散野無訟屈之聲朝有  
爭寵之歎上下相陵長幼失貫於是借玄虛以助溺引  
道德以自獎戶詠恬曠之辭家畫老莊之象今王生沉

淪名利身尚帝女連耀三光有出無處池非巖石之溜  
宅非茅茨之宇馳屈產於皇衢畫茲象其焉取嗟乎先  
生高迹何局生處巖岫之居死寄彫楹之屋託非其所  
沒有餘辱悼大道之湮晦遂含悲而吐曲

文章辨體彙選卷七百四十四

欽定四庫全書

文章辨體彙選卷七百四十五

明 賀復徵 編

弔文二

弔塞上翁文

唐陳子昂

居近南海四百餘里有古城焉土人云是塞上翁城今  
為戍其基局趾跡蓋數千年也丙戌歲兮我征匈奴恭  
聞北叟託國此都予尚于叟日月遐邁及今來思實獲

心契欣問于叟何德其愚僻居幽漠浩與世殊亡情逸  
馬胡寧而知福謝于隣人何達而不淑丁男既存君子  
知復人以為極也伊懷茲土既板且築局禁天崇墉隍  
雲矗今則荒穢世不鍾毓其故何哉賢叟之德登叟之堂  
天道何遠而茲理茫茫人世自故兮丘壠崩荒魂魄何  
獨不歸故鄉叟乎叟乎我心之傷

弔國殤文

張說

北伐兮東弧邈遼陽兮孤竹偏師兮覆衆在崇山兮峽

谷露芄芄兮蔓草風蓁蓁兮拱木見馬血兮夜燃聞殤  
魂兮雨哭君王按金鼓而氣憤撫珠鈴而淚滋橫萬里  
兮抽恨弔羣山以寫悲懟凶將兮我辱悼勇夫之被累  
彼前鑒兮未遠何後來兮不追對死地兮出陣臨傷門  
兮用師軍奪帥兮虹蝕壘車脫腹兮火焚旗有樂鷹兮  
愼矣無范宣兮愧之命窮追兮短兵錯膚迎刃兮血染  
鏑旋殘潰兮棄組練山猶號兮谷餘戰殪原野兮奈何  
違君親兮不見於戲何天命之奄忽俾仁義之治兵為

蠻夷之俘骨酸六校之飛將鎮五營之勁卒吾見出兮  
不歸噫名存兮身歿

弔古戰場文

李華

浩浩乎平沙無垠賈不見人河水縈帶羣山糾紛黯兮  
慘悴風悲日曛蓬斷草枯凜若霜晨鳥飛不下獸挺亡  
羣亭長告余曰此古戰場也常覆三軍往往鬼哭天陰  
則聞傷心哉秦與漢與將近代與吾聞夫齊魏徭戍荆  
韓召募萬里奔走連年暴露沙草晨牧河冰夜渡地闊

天長不知歸路寄身鋒刃膈臆誰訴秦漢而還多事四  
夷中州耗斁無世無之古稱戎夏不抗王師文教失宣  
武臣用奇奇兵有異于仁義王道迂闊而莫為嗚呼噫  
嘻吾想夫北風振漠弧兵伺便主將驕敵期門受戰野  
豎旄旗川迴組練法重心駭威尊命賤利鏃穿骨驚沙  
入面主客相搏山川震眩聲折江河勢崩雷電至若窮  
陰凝閉凜冽海隅積雪沒脛堅冰在鬚鷺鳥休巢征馬  
踟躕繒纊無溫墮指裂膚當此苦寒天假強弧憑陵殺



氣以相剪屠徑截輜重橫攻士卒都尉新降將軍復殄  
屍填巨港之岸血滿長城之窟無貴無賤同為枯骨可  
勝言哉鼓衰兮力竭矢盡兮絃絕白刃交兮寶刀折兩  
軍感兮生死決降矣哉終身夷狄戰矣哉暴骨沙礫鳥  
無聲兮山寂寂夜正長兮風淅淅魂魄結兮天沉沉鬼  
神聚兮雲幕幕日光寒兮草短月色苦兮霜白傷心慘  
目有如是耶吾聞之牧用趙卒大破林弧開地千里遁  
逃匈奴漢傾天下財殫力痛任人而已其在多乎周逐

獬狁北至太原既城朔方全師而還飲至策勲和樂且  
閑穆穆棟棟君臣之間秦起長城竟海為閼荼毒生人  
萬里朱殷漢擊匈奴雖得陰山枕骸遍野功不補患蒼  
蒼蒸民誰無父母提攜捧負畏其不壽誰無兄弟如足  
如手誰無夫婦如賓如友生也何恩殺之何咎其存其  
殁家莫聞知人或言將信將疑悁悁心目寢寐見之  
布奠傾觴哭望天涯天地為愁草木悽悲弔祭不至精  
魂無依必有凶年人其流離嗚呼噫嘻時耶命耶從古

如斯為之奈何守在四夷

弔萇弘文

柳宗元

萇弘字叔問周敬王時劉文恭公與萇弘告晉城成周  
晉從之及范中行之難晉人殺弘藏其血三年而化為  
碧宗元哀其以忠死故弔之

有周之羸兮邦國異圖臣乘君則兮王易為侯威強逆  
制兮鬱命轉幽疹蠱膠密兮肝膽為仇奸權蒙貨兮忠  
勇以劉伊時云幸兮大夫之羞嗚呼危哉河渭潰溢兮

橫軀以抑嵩高圻陲兮舉手排直歷溺之不慮兮堅剛  
以為武知死不可撓兮明章人極夫何大夫之炳烈兮  
王不寤夫讒賊卒施快於剽狡兮怛就制乎強國松栢  
之斬刈兮翦茸欣植盜驪折足兮罷駑抗臆驚鳥之高  
翔兮夔狐揣而不食竊畏忌以羣朋兮夫孰病百而伸  
一挺寡以校衆兮古聖人之所難矧援羸以威傲兮茲  
固蹈殆而違安殺身之匪予戚兮閔宗周之不完豈成  
城以夸功兮哀清廟之將殘嫉彪子之肆誕兮彌皇覽

以為嫚始舍道以從世兮焉用夫考古而登賢指白日  
以致憤兮卒頽幽而不列版上帝以飛精兮黜廖廓而  
殄絕竭憑雲以弭愬兮終冥冥以鬱結欲登山以號辭  
兮愈洋洋以超忽心汨洄其不化兮形凝冰而自慄圖  
始而慮末兮非大夫之搯陷瑕委厄兮固衰世之道知  
不可而愈進兮誓不偷以自好陳誠以定命兮侔貞臣  
與為友比干之以仁義兮緬遼絕以不羣伯夷殉絜以  
莫怨兮孰克軌其遺塵苟端誠之內虧兮雖耆老其誰

珍古固有一死兮賢者樂得其所大夫死忠兮君子所  
與嗚呼哀哉敬余忠甫

弔屈原文

柳宗元

後先生蓋千祀兮余再逐而浮湘求先生之汨羅兮擘  
蘅若以薦芳願荒忽之顧懷兮冀陳詞而有光先生之  
不從世兮惟道是就支離搶攘兮遭世孔疚華蟲薦壤  
兮進御羔裘牝鷄咿嚶兮孤雄束咮哇咬環觀兮蒙耳  
大呂望喙以為羞兮焚棄稷黍犴獄之不知避兮宮庭

之不處陷途藉穢兮榮若繡黼攘折火烈兮娛娛笑舞  
讒巧之嘵嘵兮惑以為咸池便媚鞠恣兮美逾西施謂  
謨言之怪誕兮反寘璵而遠違匿重痼以諱避兮進能  
緩之不可為何先生之凜凜兮厲鍼石而從之但仲尼  
之去魯兮曰吾行之遲遲柳下惠之直道兮又焉往而  
可施今夫世之議夫子兮曰胡隱忍而懷斯惟達人之  
卓軌兮固僻陋之所疑委故都以從利兮吾知先生之  
不忍立而視其覆墜兮又非先生之所志窮與達固不

渝兮夫唯服道以守義矧先生之悃悞兮陷大故而不  
貳沈璜瘞佩兮孰幽而不光荃蕙蔽匿兮胡久而不芳  
先生之貌不可得兮猶髣髴其文章託遺編而歎喟兮  
渙余涕之盈眶呵星辰而驅詭怪兮夫孰救於崩亡何  
揮霍夫雷電兮苟為是之荒茫耀姱辭之矐朗兮世界  
以是之為狂哀余衷之坎坎兮獨蘊憤而增傷諒先生  
之不言兮後之人又何望忠誠之既內激兮抑銜忍而  
不長竿為屈之幾何兮胡獨焚其中腸吾哀今之為仕



分庸有慮時之否臧食君之祿畏不厚兮悼得位之不  
昌退自服以默默兮曰吾言之不行既媮風之不可去  
兮懷先生之可忘

弔韓弇沒胡中文

李觀

維唐貞元元年匈奴上款乞盟天子以其言誠乃命上  
將往墀陰山而聽其誓言監察御史韓君載筆而隨焉  
我上將仗九廟之信而首盟其間以戎人心為心戎乘  
我不虞而有詭謀我計無素成而奸以宿萌故勇者死

奔者追而韓君為之擒矣嗚呼有備無患軍志也戎人  
安所暴其詐千慮一失聖人也韓君是以為之虜天其  
或者將用警我非福戎也韓君為之擒其繫命數五年  
于茲生死不尋為之生豈復還期謂之死永永湮沉或  
曰死矣曾是切商弦之心絕國浩浩窮西極濱強胡居  
之犬視斷斷流沙無波陰山無春邊草不綠塞鴻不賓  
秦有長城漢有遺人死者虜鬼生者虜臣哀哀韓君生  
死窮辜鬼能靈人能語君生其所君死其所今兩寂然

心繇中阻君初奉役意氣西道白圭之貺唾掌可保激  
魯陽之勇歎典屬之老乃即于事不能畫奇從軍之籌  
君固職之可疑不疑固用阡危羗戎髮髯坐乃我師倉  
卒闇習血殷朔陞實死者痛非擒者悲夾谷之會不聞  
仲尼秦中九月黃葉始下長風西來烈烈飄瓦望君申  
弔亦懼來者已乎一魂時也命也

文章辨體彙選卷七百四十五

欽定四庫全書

文章辨體彙選卷七百四十六

明 賀復徵 編

弔文三

弔茂陵文

明方孝孺

祇明祀而言旋兮指槐里以西征停策憇于道傍兮觀  
高丘之崢嶸即故老而訊之兮惟漢武皇之茂陵整冠  
裳而疾趨兮躋遺廟以屏營淒風起于叢棘兮飈颺嘯

于幽壁慨雄心之靡託兮悲曼志之無成惟君皇之御  
極兮邁炎靈之方熾陋堯禹為未足遵兮卑祖武而弗  
肯繼內瘠民以自殖兮外震威乎遐裔騁車轍于八荒  
兮候神人于海澨建千門與萬戶兮殫土木之奢麗希  
軒轅之騰化兮永傲睨乎斯世何盛業之易隳兮洪謨  
鬱而難宣雖暫弱乎戎敵兮生民疲弊而不痊奇禍機  
于巫蠱兮妃肩丁毒而啣冤諒逞心于屠滅兮抑天道  
之致然闢土疆之宏廓兮曾玄宮之莫固赫兵革之繁

庶兮委守衛於草露城闕之崇敞兮求斷礎而無所後  
宮之韶冶兮僅或傳其塚墓像祈連以旌武兮想壯魄  
之已腐嗚呼哀哉形必有盡兮孰不有亡匪君皇之獨  
然兮尚奚為隱憫而迴遑惟祈生之已甚兮惑妖誕而  
過望謂長年而卒老死兮斯足垂戒于昏荒明固有所不  
達兮智固有所短偉才畧之英邁兮哲與愚其相半賴  
表聖而黜邪兮兼善悔而能斷雖人恫而財竭兮終克  
免乎危亂悼往者之無知兮尚來者之可諫感盛衰之

相襲兮仰昊天而永嘆

弔張巡文

張鷟山

粵李唐之中葉兮撫盈成之懿治勵初志於開元兮庶  
幾乎貞觀之際何昊天之棄我兮生尤物以作孽穢匿  
閨閫兮嬖彼戎羯蘊蝗蠹于赤心兮甘與處而不能舍  
叶既失伍而遁辟兮聞忠言而齎怒震輦鼓於漁陽兮  
環郡邑而瓦解捧圖地甘心於敵兮曾無一人之慷慨  
龍矯矯而西御兮雲依依其何從方先生之令于真源

兮抗悖逆之予攻齎忠義以適睢陽兮悼綱常之不立  
惟辱與死之吾分分明吾心之靡忒嗚呼哀哉百川潰  
溢兮軀以防之大厦傾危兮一木圖支激寡以抗衆兮  
恃忠義以為櫓驅羸以威勁兮匪血氣之為武餉餽弗  
繼兮烹及鎧弩孱稚易食兮寧幼艾之足怙豈孤墉之  
徒存兮實江淮之所仗匪能官以自要兮痛元首之多  
恙力既竭而莫支兮蠅螟升而蛟踣望西風以下拜兮  
誓為厲鬼以殲寇悲風橫來兮苦霧四塞飛義血於霜



研兮液野草其成碧魂激烈其未亡兮白日慘而聲咽  
阻不可撲之虐焰兮疇宣其力瞻中興之財用兮孰闡  
其業士固死之為忠兮徒死者特以成名身既殺而事  
以成兮等死亦有重輕吁嗟乎今之人兮畏鼠如虎歎  
祿食之不厚兮孰與折衝而禦侮顧衷腸之勃鬱兮懷  
壯節其如覩恨養士之靡效兮弔先生于千古

弔岳武穆王文

張邦奇

溯大江而西征兮載馳瞻乎上遊登崇宮之奕奕兮忽

予涕之橫流凌蒼霄之冰蘖兮孰嚴霜之能摧厲高秋  
之鷲翰兮為鷲鳩之所裁悲自古之蓋臣兮未有如夫  
子之冤抑既皇天之表此心兮芳烈烈其焉極鼠惴慄  
以營腹兮吾未知其樂也舍義命而不渝兮固夫子之  
覺也以七尺之微軀兮而扶綱常於萬古相民生之攸  
厝兮將舍此其焉所嗚呼悲哉孰生非其父母兮而忍  
自投身於穢也媮旦夕以苟容兮貽子孫之累也紛詬  
詈之莫辭兮懷生死之媿也殷宇宙之羣動兮與化去

之紛紛惟忠烈之不亡兮人今如見其精魂揆帝命之  
孔晰兮慨人生之多蒙獨徘徊以瞻眺兮搆予思之無  
窮

弔李默菴先生文

何景明

嗚呼古人言感恩易爾知己難也景明于公所以慟悼  
吁涕不能自己者匪徒感恩重知己之難也夫景明昔  
寓于公是時有毛夫人也公執詩書毛夫人執燈燭晝  
夜課景明誦讀居也視衣食還也饋車馬此豈不有父

母恩耶是時景明幼孺非有能知也公以成人禮之又  
日察其言動中善者稱于人其所望見又皆可以施之  
天下百世者不以時世富幸榮慕也公嘗盛衣冠入召  
景明語毛夫人在傍公謂曰汝視予貴邪他日是子所  
貴者奚翅予邪然我所重望者匪為能貴已也嗚呼古  
人謂知已有若此邪白首握手終日語心而不知者何  
可勝道邪古人曰無德不報又曰為知己者死今公逝  
矣毛夫人又先亡矣景明雖欲報而死也無日矣他日

縱有能施于汝佐諸子然二尊人又安能知邪矧汝佐諸子又能自大予又安能有施也雖然公所望見予者豈在報邪在望見景明之自能就立爾今雖能取一第為一官使公及見然所自就立者也弗若公所望見者也即他日又有能自就立公又安能知邪矧景明寡昧弗達所自就立欲大于往日如公所望見者又安能有也嗚呼已矣何以酬公之德而副公之知邪山川伊阻不能棄官赴公喪執紼道輒我懷之悲惟公有靈鑒之

已矣嗚呼哀哉

文章辨體彙選卷七百四十六

欽定四庫全書

文章辨體彙選卷七百四十七

明 賀復徵 編

弔書一

正體

弔陳永長書

晉陸雲

與永曜相得便結願好契闊分愛恩同至親憑烈三益  
終始所願中間離別但爾累年結想之懷夢寐仞佛何  
圖忽爾便成永隔哀心慟楚不能自勝痛當奈何奈何



義在奔馳牽後萬里至心不斂東望貴舍兩淚沾襟今遣吏并進薄祭不得臨哀追贈切裂幸損至念書重不知所言永曜素自強健了不知有此患險巖之災遂不可救豈惟貴門獨喪重寶此賢之殞邦家以瘁情分異地痛心殊深已矣遠矣可復奈何追想遺規不去心目悠悠無期哀至裴裂不知何言可以言知酷楚而已

弔樂永世書

梁任昉

永世孝友之至發自天真皎潔之操曾非矯飾意有所

固白刃不移理有所托溜湏自辨餘息惟存視陰無幾  
終始之托方寄祁侯豈謂樂生反先朝露以理還滯鄙  
識未曉以事尋悲哀楚交至宿草易滋傷恨不減松檟  
可拱悲緒無窮

文章辨體彙選卷七百四十七

欽定四庫全書

文章辨體彙選卷七百四十八

明 賀復徵 編

弔書二

別體

復徵曰時劉賈已亡孝標作書曰答東坡作啟曰謝  
皆勑體也列之以備一種

重答劉秣陵沼書

梁劉峻

劉侯既重有斯難值余有天倫之感竟未之致也尋而

此君長逝化為異物緒言餘論蘊而莫傳或有自其家  
得而示余者余悲其音徽未沫而其人已亡青簡尚新  
宿草將列泣然不知涕之無從也雖隙駟不留尺波電  
謝而秋菊春蘭英華靡絕故存其梗槩更酬其旨若使  
墨翟之言無爽宣室之談有徵冀東平之樹望咸陽而  
西靡蓋山之泉聞絃歌而赴節但懸劒空隴有恨如何

謝賈朝奉啟

宋蘇軾

自蜀徂京幾四千里攜孥去國蓋二十年側聞松楸已

中梁柱過而下馬空瞻董相之陵酹以隻鷄誰副橋公  
之約宦游歲晚坐念涕流未報不貲之恩敢懷盍歸之  
意常恐樵牧不禁行有雍門之悲雨露既濡空引太行  
之望豈謂通判某官政先慈孝義篤友朋首隆學校之  
師儒次訪里閭之耆舊自嗟來暮不聞拔薤之規尚意  
神交特致生芻之奠父老感嘆桑梓光華深衣練冠莫  
克垂涕於墓道昔襦今袴尚能鼓舞於民謠仰佩之深  
力古難盡

文章辨體彙選卷七百四十八

欽定四庫全書

文章辨體彙選卷七百四十九

明 賀復徵 編

祭文一 以下四言

吳訥曰古者祀享更有冊祝載其所以祀之之意考之經可見若文選所載謝惠連之祭古塚王僧達之祭顏延年不過叙其哀悼之情而已迨後韓柳諸君子或因水旱而禱於神或因喪葬而祭親舊真情實



意溢出言辭之表誠學者所當取法者也大抵禱神以悔過遷善為主祭故舊以道達情意為尚若夫諛辭巧語虛文蔓說固弗足以動神而亦君子之所厭聽也徐師曾曰按祭文者祭奠親友之詞也古之祭祀止於告饗而已中世以還兼讚言行以寓哀傷之意蓋祝文之變也其詞有散文有韻語有儷語而韻語之中又有散文四言六言雜言騷體儷體之不同劉勰云祭奠之辭宜恭且哀若夫辭華而靡實情鬱

而不宣皆非工於此者也

為諸婦祭庾新婦文

晉潘岳

潛形幽櫬寧神舊宇室虛風生牀塵帷舉自我不見載  
離寒暑雖則乖隔哀亦時叙啓殯今夕祖行明朝雨絕  
華庭埃滅大宵儼執箕帚偕奉夕朝髣髴未行願瞻弗  
獲伏膺飲淚感今懷昔懷昔伊何祁祁娣姒感今伊何  
冥冥吾子形未廢目音猶在耳

祭從弟敬遠文

陶潛

歲在辛亥月惟仲秋旬有九日從弟敬遠卜辰云寔永  
寧后土感平生之游處悲一往之不返情惻惻以摧心  
淚慙慙而盈眼乃以園果時醪祖其將行嗚呼哀哉於  
鑠吾弟有操有槩孝發幼齡友自天愛少思寡欲靡執  
靡介後已先人臨財思惠心遺得失情不依世其色能  
溫其言則厲樂勝朋高好是文藝遙遙帝鄉爰感奇心  
絕粒委務考槃山陰淙淙懸溜曖曖荒林晨採上藥夕  
閑素琴曰仁者壽竊獨信之如何斯言徒能見欺年甫

過立奄與世辭長歸萬里邈無還期惟我與爾匪但親  
友父則同生母則從母相及韶齒並罹偏咎斯情實深  
斯愛實厚念疇昔同房之歡冬無緼褐夏渴瓢簞相將  
以道相開以顏豈不多之忽忘饑寒余嘗學仕纏綿人  
事流浪無成懼負素志歛策歸來爾知我意常願攜手  
寘彼衆意每憶有秋我將其刈與汝偕行舫舟同濟三  
宿水濱樂飲川界靜月澄高溫風始逝撫杯而言物久  
人脆柰何吾弟先我離世事不可尋思亦何極日徂月

流寒暑代息死生異方存亡有域侯晨永歸指塗載陟  
呱呱遺稚未能正言哀哀嫠人禮儀孔閑庭樹如故齋宇  
廓然孰云敬遠何時復還余惟人斯昧茲近情著龜有  
吉制我祖行望旒翩翩執筆涕盈神其有知昭余中誠  
嗚呼哀哉

祭程氏妹文

陶潛

維晉義熙三年五月甲辰程氏妹服制再周淵明以少  
牢之奠俛而酌之嗚呼哀哉寒往暑來日月寢踈染塵

委積庭草荒蕪寥寥空室哀遺孤有觴虛奠人逝馬  
如誰無兄弟人亦同生嗟我與爾特百常情慈妣早世  
時尚孺嬰我年二六爾纔九齡爰從靡識撫髻相成咨  
爾令妹有德有操靖恭鮮言聞善則樂能正能和惟友  
惟孝行止中閨可象可儆我聞為善慶自己蹈彼蒼何  
偏而不斯報昔在江陵重罹天罰兄弟索居乖隔楚越  
伊我與爾百哀是切黯黯高雲蕭蕭冬月白雲掩晨長  
風悲節感惟崩號興言泣血尋念平昔觸事未遠書疏

猶存遺孤滿眼如何一往終天不返寂寂高堂何時復  
踐藐藐孤女曷依曷恃梵梵游魂誰主誰祀柰何程妹  
於此永已死如有知相見蒿里嗚呼哀哉

自祭文

陶潛

歲惟丁卯律中無射天寒夜長風氣蕭索陶子將辭逆  
旅之館永歸於本宅故人悽其相悲同祖行於今夕羞  
以嘉蔬薦以清酌侯顏已冥聆音愈漠嗚呼哀哉茫茫  
大塊悠悠高旻是生萬物余得為人自余為人逢運之

貧簞瓢屢罄締結冬陳含歡谷汲行歌負薪翳翳柴門  
事我宵晨春秋代謝有務中園載耘載耔乃育乃繁欣  
以素牘和以七絃冬曝其日夏濯其泉勤靡餘勞心有  
常閒樂天委分以至百年惟此百年夫人愛之懼彼無  
成愒日惜時存為世珍沒亦見思嗟我獨邁曾是異茲  
寵非已榮涅豈吾溜粹兀窮廬酣飲賦詩識運知命疇  
能罔眷余今斯化可以無恨壽涉百齡身慕肥遁從老  
得終奚所復戀寒暑逾邁亡既異存外姻晨來良友宵



奔葬之中野以安其魂  
窅窅我行蕭蕭墓門奢  
耻宋臣儉笑王孫廓  
今已滅慨焉已遐不封  
不樹日月遂過匪貴  
前譽孰重後歌人生實  
難死如之何嗚呼哀哉

祭古冢文

宋謝惠連

東府掘城北塹入丈餘得古冢上無封域不用磚甃以木為槨中有二棺正方兩頭無和明器之屬材瓦銅漆有數十種多異形不可盡識刻木為人長三尺可有二十餘頭初開見悉是人形以物振撥之應手灰滅棺上

有五銖錢百餘枚水中有甘蔗節及梅李核瓜瓣皆浮  
出不甚爛壞銘誌不存世代不可得而知也公命城者  
改埋於東崗祭之以豚酒既不知其名字遠近故假為  
之號曰溟漠君云爾元嘉七年九月十四日司徒御屬  
領直兵令史統作城錄事臨漳令亭侯朱林具豚醪之  
祭敬薦冥漠君之靈忝總徒旅版築是司窮泉為漸聚  
壤成基一擲既啟雙棺在茲捨畚悽愴縱鍤漣而窮靈  
已毀塗車既摧几筵糜腐俎豆傾低盤或梅李盞或醢

醢蔗傳餘節瓜表遺犀追惟夫子生自何代曜質幾年  
潛靈幾載為壽為夭寧顯寧晦銘誌堙滅姓氏不傳今  
誰子後曩誰子先功名美惡如何蔑然百堵皆作十仞  
斯齊壙不可轉壟不可迴黃腸既毀便房已頽循題興  
念撫俑增哀射聲垂仁廣漠流渥祠骸府阿掩骼城曲  
仰羨古風為君改卜輪移北隍窀穸東麓壙即新營棺  
仍舊木合葬非古周公所存敬遵昔義還祔雙魂酒以  
兩壺牲以特豚幽靈髣髴歆然犧樽嗚呼哀哉

祭屈原文 顏延之

維有宋五年月日湘州刺史吳郡張邵恭承帝命建旗  
舊楚訪懷沙之淵得捐佩之浦弭節羅潭艤舟汨渚乃  
遣戶曹掾某敬祭故楚三閭大夫屈君之靈蘭薰而推  
玉纁則折物忌堅芳人諱明潔曰若先生逢辰之缺溫  
風急時飛霜急節羸羊邁紛昭懷不端謀折儀尚貞蔑  
椒蘭身絕郢闕跡徧湘干比物荃蓀連類龍鸞聲溢金  
石志華日月如彼樹芳實穎實發望汨心稀瞻羅思越

籍用可塵昭忠難闕

祭顏光祿文

王僧達

維宋孝建三年九月癸丑朔十九日辛未王君以山羞  
野酌敬祭顏君之靈嗚呼哀哉夫德以道樹禮以仁清  
惟君之懿早歲飛聲義窮幾象文蔽班揚性倬剛潔志  
度淵英登朝光國實宋之華才通漢魏譽浹龜沙服爵  
帝典棲志雲阿清交素友比景安波氣高叔夜嚴方仲  
舉逸翮獨翔孤風絕侶流連酒息嘯歌琴緒游顧移年

契濶宴處春風首時爰談爰賦秋露未凝歸神太素明  
發晨駕瞻廬望路心悽目眩情條雲互涼陰掩軒娥月  
寢耀微燈動光几牘誰炤衾衽長塵絲竹罷調擊悲蘭  
宇屑涕松嶠古來共盡牛山有淚非獨昊天殲我明懿  
以此悲哀敬陳奠饋申酌長懷顧望歔歔嗚呼哀哉

梁簡文帝祭戰亡者文

降夫既旋功臣又賞班荷元勲蘇逢漏網校尉霑榮屬  
國蒙獎獨念斷魂長畢灰壤膏原染必委骨埋泉徒聞

身沒詎辯名傳

蕭驃騎祭石頭戰亡文

梁江淹

咸告忠貞之魂曰義惟行首雄實士節嗟爾驍騎稟才  
蹈烈守王不渝懷冰可折氣彰靡旗情瞰亂轍高墉摧  
堅巨醜挫銳深痛克矜冤靈及雪隆恩殊悼臨爾以歎  
千秋同盡百齡一世冤而有知咸無遠邇嗚呼哀哉

文章辨體彙選卷七百四十九

欽定四庫全書

集部

文章辨體彙選卷七百五十二

詳校官中書<sub>臣</sub>李采

主事銜<sub>臣</sub>徐以坤覆勘

總校官檢討<sub>臣</sub>何思鈞

校對官中書<sub>臣</sub>高 中

謄錄監生<sub>臣</sub>施 華



欽定四庫全書

文章辨體彙選卷七百五十

明 賀復徵 編

祭文二

祭杜康文

唐王勣

兩儀判闢萬象森羅都邑未建鳥獸獨多茹毛飲血巢  
居穴窠天地不交人靈未和智哉先生爰作甘醴上配  
百牢下主五齊以宴以禱為樽為洗萬神以降三獻成

禮法成必弊文盛則華奚仲斲輪焉知覆車桀紂亡國  
義和喪家周公作誥迺防厥邦我聞古時王道正直賢  
人君子澡身浴德降及中世昏主作式刑罰不中譏淫  
罔極吁嗟世道一至於此達人大觀貴和其禮與制於  
物寧在於已乘流則逝遇坎則止眷茲酒德可以全身  
杜明塞智蒙垢受塵阮藉遂性劉伶保真此避其世於  
今幾人我瞻前說功高受賞嗟嗟先生其義可想肇基  
麴蘖光開祀饗大禮斯脩羣賢就養敢依河曲建爾靈

祀前臨極岸却就長磯茅茨不剪采椽不治掃地而祭  
神其享之

祭處士仲長子光文

王勣

歲月日隣人王勣謹以魚醴之奠敬祭仲長先生之靈  
曰明道若昧進道若退鳥飛知還龍亢必悔嗟嗟夫子  
理融其內不忮不求無憎無愛古人有言微妙玄通藏  
用以密養正以蒙嗟嗟夫子允執厥中不見其始孰知  
其終蕩蕩心跡悠悠默語周覽人事退居河渚何去何

從誰棄誰與聊同聚散不均寒暑大矣夫子其生若浮  
至矣夫子其死若休鄉黨不懼朋友不憂素琴猶在黃  
經尚留老萊不婚梁鴻難偶筵無饋奠室無箕箒嗟嗟  
夫子豈圖其後金玉滿堂莫為之守凡我故人素服臨  
旛葛巾從窆桐棺以遷墳不易壠坎不及泉苟無怛化  
於何問天道性既喪仁義鋒起祭非古也禮之為始吾  
從其俗敢告夫子清樽薄奠神其歆止

祭宇文夫人文

陳子昂

維年月日朔女夫某謹以清酌嘉蔬之奠奉祭于故高  
氏河南宇文夫人之靈恭聞夫人有清穆之德皓潔之  
行淳懿肅恭內外仰則而遺風素範蕙敷蘭滋用能惠  
心光乎氤氲治汴崇嚴壺訓芬郁母儀中饋柔嘉娣如  
有則豈圖慈顏幽翳於今年墓木已拱尊靈廓然今吉  
辰協應幽殯方開容象如在器質已灰改卜禮典宅兆  
方遷山園既列祖載行焉哀子號咷女也蟬媛終天永  
訣泣血流漣某謬承嘉惠預叨姻戚生事早睽送終空

積竊聞精意以享黍稷非馨敢陳薄酌以獻明靈伏惟  
夫人明神尚饗

祭夫徐敬業文 劉令嫺

維梁大同五年新婦謹薦少牢於徐府君之靈曰惟君  
德爰禮智才兼文雅學比山成辯同河瀉明經擢秀光  
朝振野調逸許中聲高洛下含潘度陸超終邁賈二儀  
既肇判合始分簡賢依德乃隸夫君外治徒奉內佐無  
聞幸移蓬性頗習蘭薰式傳琴瑟相酬典墳輔仁難驗

神情易促電碎春紅霜雕夏綠躬奉正衾親觀啟足一  
見無期百身何贖嗚呼哀哉生死雖殊情親猶一敢遵  
先好手調薑橘素俎空乾奠觴徒溢昔奉齊眉異於今  
日從軍暫別且思樓中薄游未反尚比飛蓬如當此訣  
永痛無窮百年何幾泉穴方同

為崔常侍祭牙門姜將軍文

王維

維大唐開元二十五年歲次丁丑十一月辛未朔四日  
甲戌左散騎常侍河西節度副大使攝御史中丞崔公

致祭於故姜公之靈嗚呼天子命之建旗西門帶甲十  
萬鐵騎雲屯橫挑疆胡飲馬河源嗟爾勇健表為牙門  
牙門伊何全齊大族四方有事誓死嗚轂前有血刃後  
有飛鏃其氣益振大呼馳逐翩翩白馬象弧雕服戈春  
其喉矢集其目嗚呼天下無事今上好文爾有餘勇其  
敢邀勲腰鞬白首嗟跼塞雲死於裨將誰統前軍家本  
秦人靈車東驚長天積雪邊城欲暮麾下行哭前旌抗  
路身有寶劍不佩而去轅有代馬悲鳴跼顧嗚呼我誠



軍吏令送爾歸既素我服亦朱其衣黥虜未滅壯士長  
辭牢醴以祭太息獻歎尚饗

祭陸端公文

顧況

維大曆八年正月朔同鄉顧況於永嘉發使具簞蔬野  
酌敬祭陸三十二兄端公之靈嗚呼接席之歡俄成奠  
酒殊鄉少別杳忽於今牽拘南役遠哭如淚兄秉德居  
厚植靈超茂天和發外虛白自內特挺孤操與物去害  
惟昔二京羣盜縱橫出入十年天下交兵越盜寇吳殺

人燒城國危如此公乃請行我之行焉無往不平擁陣  
陵陽迴戈歛右江南山洞畧盡遺醜拒敵先摧羣降獨  
受兄之令弟況之良友感激風雲留連詩酒昔魏有人  
子方段干兄之所在人心獲安賢者讓平惟患是急兄  
之忠勇人莫能及燕將泣書齊師復邑迹為功著名因  
義立惟帝念功君門遂通臺閣生風乃憶江東高臨山  
中有書滿屋與人共讀有粟如雲與人共分破富為貧  
好事日間靄靄牛潭栽栽囊嶺開流架迥倒寫烟景今

日淒涼林空夜永人或有言吉凶無門我命由我以兄之  
才何適不可寧知一旦忽鍾茲禍鴻翔千仞自茲而墮  
嗚呼哀哉伏惟尚饗

祭河南張貞外文

韓愈

維年月日彰義軍行軍司馬守太子右庶子兼御史中  
丞韓愈謹遣某乙以庶羞清酌之奠祭於亡友故河南  
縣令張十二貞外之靈貞元十九君為御史余以無能  
同詔並跼君德渾剛標高揭已有不吾如唾猶泥滓余

慙而狂年未三紀乘氣加人無挾自恃彼婉孌者實憚  
吾曹側肩帖耳有舌如刀我落陽山以尹鼂孫君飄臨  
武山林之牢歲弊寒兇雪虐風饕顛於馬下我泗君咷  
夜息南山同臥一席守吏防夫觝頂交跼洞庭漫汗粘  
天無壁風濤相砥中作霹靂追程盲進颿船箭激南上  
湘水屈氏所沈二妃行迷淚蹤染林山哀浦思鳥獸呌  
音余唱君和百篇在吟君上於縣我又南踰把觥相飲  
後期有無期宿界上一又相語自別幾時遽變寒暑枕

臂歌眠加余以股僕來告言虎入廐處無敢驚遂以我  
驂去君云是物不駿於乘虎取而往來寅其徵我預在  
此與君俱膺猛獸果信惡禱而憑余出嶺中君竢州下  
偕掾江陵非余望者郴山奇變其水清寫泊砂倚石有  
還無捨衡陽放酒熊咆虎嘯不存今章罰籌蝟毛委舟  
湘流往觀南嶽雲壁潭潭穹林攸擢避風太湖七日鹿  
角鈎登大鮎怒頰豕狗鬻盤炙酒羣奴餘啄走官階下  
首下尻高下馬伏塗從事是遭予徵博士君以使已相

見京師過顧之始分教東生君掾雍首兩都相望於別  
何有解手背面遂十一年君出我入如相避然生濶死  
休吞不復宣刑官屬郎引章訐奪權臣不愛南昌是幹  
明條謹獄氓獠戶歌用遷澧浦為人受瘥還家東都起  
令河南屈拜後生憤所不堪屢以正免身伸事寔竟死  
不昇孰勸為善丞相南討余辱司馬議兵大梁走出洛  
下哭不憑棺奠不親筭不撫其子葬不送野望君傷懷  
有隕如瀉銘君之績納石壤中爰及祖考紀德事功外

著後世鬼神與通君其奚憾不余鑒衷嗚呼哀哉尚饗

祭柳子厚文

韓愈

嗟嗟子厚而至然耶自古莫不然我又何嗟人之生世  
如夢一覺其間利害竟亦何校當其夢時有樂有悲及  
其既覺豈足追維凡物之生不願為材犧樽青黃乃木  
之災子之中棄天脫韁羈玉珮瓊琚大放厥辭富貴無  
能磨滅誰紀子之自著表表愈偉不善為斲血指汗顏  
功匠旁觀縮手袖間子之文章而不用世乃令吾徒掌

帝之制子之視人自以無前一斥不復羣飛刺天嗟嗟  
子厚今也則亡臨絕之音一何琅琅徧告諸友以寄厥  
子不鄙謂余亦托以死凡今之交觀勢厚薄余豈可保  
能承子託非我知子子實命我猶有鬼神寧敢遺墜念  
子永歸無復來期設祭棺前矢心以辭嗚呼哀哉尚饗

祭穆負外丈

韓愈

於乎建中之初余居於嵩攜扶北奔避盜來攻晨及洛  
師相遇一時顧我如故眷然顧之子有令聞我來自山



子之峻明我鈍而頑道既云異誰從知我我思其厚不  
知其可於後八年君從杜侯我時在洛亦應其招留守  
無事多君子僚罔有疑忌維其嬉游草生之春鳥鳴之  
朝我轡在手君揚其鑣君居於室我既來即或以嘯歌  
或以偃側誨余以義復我以誠終日以語無非德聲主人  
信讒有惑其下殺人無罪誣以成過入救不從反以為  
福赫赫有聞王命三司察我於獄相從係縲曲生何樂  
直死何悲上懷主人內閔其私進退之難君處之宜既

釋於囚我來徐州道之悠悠思君為憂我如京師君居  
父喪哭泣而拜言詞不通我歸自西君反吉服晤言無  
它往復其昔不日而違重我心惻自後聞君母喪是丁  
痛毒之懷六年以并孰云孝子而殞厥靈今吾之至入  
門失聲酒肉在前君胡不餐升君之堂不與我言於乎  
死矣何日來還

祭鄭夫人文

韓愈

嗚呼天禍我家降集百殃我生不辰三歲而孤蒙幼未

知鞠我者兄在死而生實維嫂恩未訖一年兄宦王官  
提攜負任去洛居秦念寒而衣念饑而殮疾疹水火無  
災及身劬勞閔閔保此愚庸年方及紀薦及凶屯兄罹  
讒口承命遠遷窮荒海隅天關百年萬里故鄉幼孤存  
前相顧不歸泣血號天微嫂之力化為夷蠻水浮陸走  
丹旄翩然至誠感神反葬中原既克反葬遭時艱難百  
口偕行避地江濱春秋霜露薦敬蘋蘩以享韓氏之祖  
考曰此韓氏之門視予猶子誨化諄諄爰來京師年在

成人屢貢於王名乃有聞念茲頓頑非訓曷因感傷懷  
歸墮涕薰心苟容躁進不顧其躬祿仕而還以為家榮  
奔走乞假東西北南孰云此來乃睹靈車有志弗及長  
負殷勤嗚呼哀哉昔在韶州之行受命於元兄曰爾幼  
養於嫂喪服必以期今其敢忘天實臨之嗚呼哀哉日  
月有時歸合塋封終天求辭絕而復蘇尚饗

祭薛助教丈

韓愈

維元和四年歲次己丑後三月二十一日丙寅朝散郎

守國子博士韓愈太學助教侯繼謹以清酌之奠祭於  
亡友國子助教薛君之靈嗚呼吾徒學而不見施設祿  
又不足以活身天於此時奪其友人同官太學日得相  
因柰何永違祗隔數晨笑語為別慟哭來門藏棺蔽帷  
欲見無緣皎皎眉目在人目前酌以告誠庶幾有神嗚  
呼哀哉尚饗

祭侯主簿文

韓愈

維年月日吏部侍郎韓愈謹遣男殿中省進馬估致祭

於亡友故國子主簿侯君之靈嗚呼惟子文學令誰過  
之子於道義困不捨遺我狎我愛人莫與夷自始及今  
二紀於茲我或為文筆俾子持唱我和我問我以疑我  
釣我游莫不我隨我寢我休莫爾之私朋友昆弟情敬  
異施惟我與子無適不宜棄我而死嗟我之衰相好滿  
目少年之時日月云亡今其有誰誰不富貴而子為羈  
我無利權雖怨曷為子之方葬我方齋祀哭送不可誰  
知我悲嗚呼哀哉尚饗

祭呂敬叔文

柳宗元

維年月日朔友人從內兄守永州司馬負外置同正負  
柳宗元謹以酒肉之奠致祭於亡友呂敬叔之魂嗚呼  
鞠躬歷聘或以不答屠漁垂離夫何克合大或不容小  
或見遺往來逢迎今古參差惟子之中忠勇克之以誠  
與物退受其疵智謀宏長辨論恢奇巖我博大與世異  
姿何付之器而躋於時嘗曰余武王功是期誓耆其力  
以達皇威邊鄙不靖俾供輿師諸侯順道戎貆咸宜今

其沒矣哀志之違知之無補世又罕知嗚呼哀哉昔與  
子游尚疑其志及觀其長誠任其事日異其能歲增其  
智進如川行浩浩而遂天乎有亡中道是棄余慎取友  
惟心之虔周游人間餘二十年擯辱非恥升揚非賢一  
貫於道無四五焉子之我知不以事遷言而見信貌阻  
心傳我默終世子天於前徒稱子志誰信我言與子俱  
已孰云後先惟子之兄志同義比官刺一州四十而死  
子仕方初百年有幾如何默默去我遄已有稚之妻有



弱之子海墻東周號哭萬里葬紉之行獲出於此爰陳酒  
肉式嘉且旨讀茲哀辭以奠而誄嗚呼敬叔吾道已矣  
尚饗

祭崔使君敏文

柳宗元

夫產崑崙者難為玉植鄧林者難為木公以令望顯於  
華族藝文邃六書學該七錄耽此黃老恬於寵辱入補黑  
衣出參甸服紀綱淮海政令維肅宰制岳濱周於仁育  
儲闡典儀直清攸屬久次推能二州繼牧至於是邦率

由舊俗和易勿亟優游自足既有小

集作少

吏亦勤

集作勤於

庶獄詆誣殄除淫祠翦覆出令三歲人無怨讟進律未

行歸神何速某咸以罪戾謫茲炎方公垂惠和枯槁以

光鳴鸞適野泛鷁沿湘廣筵命樂華燭飛觴高歌屢舞

終以無荒紛慮斯屏憂懷暫忘良時不再斯樂難常今

其柰何顧慕增

集作感

傷嗚呼哀哉室有迭去用無息流

追懷曩晨恍若夢游奠撤

集作徹

中寢魂遷葉

集作秉

丹邦

人永思匍匐隱憂況我懷德心焉若抽潔誠可鑒蘋藻

非羞

祭柳貞外文

劉禹錫

維元和十五年歲次庚子正月戊戌朔日孤子劉禹錫  
銜哀扶力謹遣所使黃萇具清酌庶羞之奠敬祭於亡  
友柳君之靈嗚呼子厚我有一言君其聞否惟君平昔  
聰明絕人今雖化去夫豈無物意君所死乃形質耳魂  
氣何託聽余哀詞嗚呼痛哉嗟余不夭甫遭閔凶未離  
所部三使來弔憂我哀病論以苦言情深禮至款密重

復期於中路更申願言塗次衡陽云有柳使謂承前約  
勿承訃書驚號大叫如得狂病良久問故百哀攻中涕  
淚迸落魂魄震起伸紙窮竟得君遺書絕絃之音悽愴  
徹骨初託遺嗣故其不孤末言歸輅從祔先域凡此數  
事職在吾徒永言素交居多遠鄂渚差近表臣分深  
想其聞訃心勇於義已命所使持書徑行友道尚終當  
所加厚退之承命改牧宜陽亦馳一函候於便道勒石  
垂後屬於伊人安平宣英會有還使悉已如禮形於冥

書嗚呼子厚此是何事朋友凋落從古所悲不圖此言  
乃為君發自君失意沉伏遠郡近遇國士方伸眉頭亦  
見遺學恭辭舊府志氣相感心踰常倫顧余負疊營奉  
方重猶冀前路望君銘旌古之達人朋友製服今有所  
厭其禮莫伸朝晡臨後出就別次南望桂水哭我故人  
孰云宿草此慟何極嗚呼子厚卿其死矣終我所生無  
相見矣何人不達使君終否何人不老使人天死皇天  
后土胡寧悲此知悲無益柰恨無已子之不聞余心不

理含酸執筆輒伸復止誓使周六同於巳子魂兮來斯  
知我深旨嗚呼哀哉尚饗

祭韓吏部文

劉禹錫

高山亡窮太宰削成人丈亡窮夫子挺生典訓為徒百  
家抗行當時勅者皆出其下古人中求為敵蓋寡貞元  
之中帝鼓薰琴奕奕金馬文章如林君自幽谷升於高  
岑鸞鳳一鳴蜩蟬革音手持丈柄高視寰海權衡低昂  
瞻我所在三十餘年聲名塞天公鼎侯碑志遂表阡一

字之賈輦金如山權豪來侮人虎我鼠然諾洞開人金  
我灰親親尚舊丹其壽考天人之學可與論道二者不  
至至者其誰豈天與人好惡背馳昔遇夫子聰明勇奮  
常操利刃開我混沌子長在筆子長在論持矛舉楯卒  
不能困時惟子厚寘言其間贊詞愉愉闕顏顏磅礴  
上下義農以還會於有極服之無言闕岐山威鳳不復  
鳴華亭別鶴中夜驚畏簡書令搗印綬思臨慟兮志莫  
就生窮一束酒一杯故人故人歆此來

祭故福建獨孤中丞文

李翱

維大和元年歲次丁未九月庚申朔二十日己卯朝散  
大夫守右諫議大夫知制誥李翱謹以清酌庶羞之奠  
敬祭於亡友故福建都團練觀察處置等使兼御史中  
丞獨孤君侍郎之靈嗚呼昔我與君自少而歡中暫乖  
阻周荆眇綿宣城越中二府周旋同事於公職以相連  
子常推後我唱其先叔向汝齊不紉而堅蘭馨以聞乃  
在掖垣引我代已真謂其賢共升於朝亦又多年或外



或內莫余或捐君齒少我髮鬢都玄豐盈角羣氣茂神  
全當臻上壽福祉昌延何為發瘍針藥勿蠲有妻既喪  
有子童然喪祭誰主銘旌有翩嗚呼哀哉唯短與長會  
歸於死以存悲逝前後皆爾哭君之哀痛折支指欲抑  
不能縱之曷已嗚呼哀哉入君之戶但有裳帷思與君  
言不見容儀薦肉不食酌酒不持嗟嗟用晦何亟臻斯  
嗚呼哀哉尚饗

於湖州別女足墓文

李翱

維長慶元年歲次辛丑十二月癸亥朔十九日辛巳父  
舒州刺史翱以酒果以奠敬別於第七女足娘子之靈  
吾以前月二十八日蒙恩改舒州刺史以明日將領汝  
母等水路赴州故以酒果來與汝別嗚呼我為汝父汝  
則我女王命有期不得安處延陵喪子葬不歸吳考之  
於禮其合矣夫汝之形骨託終此土汝之精神冥漠不  
覩上及於天下及於泉鬼神有知汝骨安全永永終古  
無有後艱我來訣別涕淚漣漣嗚呼哀哉尚饗

祭故處州李使君文

杜牧

維會昌五年歲次乙丑某月日池州刺史杜牧謹遣軍  
事押衙王鏐謹以清酌庶羞之奠敬致祭於亡友李君  
起居之靈憶昔相遇兩未生鬚京師衆中跡猶甚疎一  
言道合盡寫有無我于宣城忝跡賓吏君隨幕府東下  
繼至復與友人故薛子威邂逅釋願如相為期放論劇  
談各持是非攻強討深張余慙機怒或絕赫終成笑嬉  
於後七年君拜左史來蜀西川我官補闕云愧我先拜

章請代蓋私我馬我有家事乞假南來循出里第君出  
離杯令弟在席恣為恢諧耳熱膽張觥觥相駭我歸墜  
馬一支幾摧君來我坐側倚旁隈時聞酸吟戲口猶開  
云君我殺以酒相加忌我之才及我南去君刺池陽我  
守黃崗葭葦之場唯君書信前後相望辭意纖悉勉我  
自彊筆我性情補短裁長一函每發沉憂并忘幸會交  
代泐檄若飛江山九月涼風滿衣為別幾時多少惟悲  
志業益廣不可窺知長人之術首為吏師縱酒十日舞

袖傲垂語公之餘且及其私許以季女配我長兒莫云  
稚齒可以指期各負少壯輕後會時寓居宣城書札日  
馳一疾不起訃來猶疑嗚呼哀哉惟先僕射儉德冠古  
凡二十年四領茅土所至多治曰人父母官俸餘半委  
庫不取京師里第蓬茅數畝慶餘生君曰天酬補何聰  
明才智兮不使施為何付與之多兮折之何暴天陽地  
陰高厚相侔上有河漢鉞普錯反天橫流百刻晝夜平分不  
饒皎不陰晦一月幾朝二男三女俗率如此三男二女

無有其地君子小人鼻目並列與小人校會無百一千  
百一中以秀奪實凡稟陰陽生于其間陽常不勝賢者  
宜艱自古皆然欲復何言撫孤一弔拍棺一哭咫尺不  
遠涕下相續期於沒齒盡力嗣子嗚呼哀哉伏惟尚饗

祭龔秀才文

杜牧

維大中五年歲次辛未五月朔二日湖州刺史杜牧謹  
遣軍事十將徐良敬致祭於故龔秀才之靈死者生之  
極折脛而天復死之極言於前定莫得而推出於偶然

魂其寃哉鄉里何在骨肉何人卞山之南可以栖魂鳴  
呼哀哉伏惟尚饗

奠相國令孤公文

李商隱

戊午歲丁未朔乙亥晦弟子王谿李商隱叩頭哭奠故  
相國贈司空彭陽公嗚呼昔夢飛塵從公車輪今夢山  
阿送公哀歌古有從死今無柰何天平之年大刀長戟  
將軍樽旁一人衣白十年忽然蜩宣甲化人譽公憐人  
諧公罵公高如天愚卑如地脫蟪如蛇如氣之易愚調

京下公病梁山絕崖飛梁山行一草奏天子鑄辭墓  
門臨絕丁寧託爾而存公此去耶禁不時歸鳳棲原上  
新舊袞衣有泉者路有夜者臺昔之去者宜其在哉聖  
有夫子廉有伯夷浮魂沉魄公其與之故山巍巍玉谿  
在中送公而歸一世蒿蓬嗚呼哀哉

文章辨體彙選卷七百五十



欽定四庫全書

文章辨體彙選卷七百五十一

明 賀復徵 編

祭文三

祭江鄰幾文

宋司馬光

嗚呼佗人之生憎愛糾紛獨君不然見之者親佗人之  
死議論交集獨君不然聞之者泣問君何修乃能致此  
率其誠心無有表裏是宜期耆光大顯融如何不淑星

未五終平日之游晨往夕來宛其在目誰能不衰念君  
素懷於物何有叙茲永遠無若卮酒尚饗

祭韓少傅文

范仲淹

維慶厯五年正月日具位某敬致祭於故太子少傅贈  
太保韓公之靈惟公寒苦而立平直以進賢才一伸淑  
聲大振天子乃知命鎮坤維兩川父老含哺而嘻入領  
中司進陟二府邦憲以清袞職斯補一德一心勿愧勿  
負偃息近藩旨酒盈樽可以卧理不廢清言功成名遂

揖讓而退為國元老望高中外子孫誥誥禮樂簪紳積  
善之報集於仁人嗚呼厥生有涯終焉惟命柱石之衰  
邦國不幸尚饗

祭資政范公文

歐陽修

嗚呼公乎學古居今持方入圓丘軻之艱其道則然公  
曰彼惡公為好訐公曰彼善公為樹朋公所勇為公則  
躁進公有退讓公為近名讒人之言其何可聽先事而  
斥羣譏衆排有事而思雖仇謂材毀不吾傷譽不吾喜

進退有儀夷行險止嗚呼公乎舉世之善誰非公徒譏  
人豈多公志不舒善不勝惡豈其然乎成難毀易理又  
然歟嗚呼公乎欲壞其棟先摧桷榱傾巢覆轂披折旁  
枝害一損百人誰不懼誰為黨論是不仁哉嗚呼公乎  
易名謚行君子之榮生也何毀沒也何稱好死惡生殆  
非人情豈其生有所嫉而死無所爭自公云亡謗不待  
辨愈久愈明由今可見始屈終伸公其無恨寫懷平生  
寓此薄奠

祭梅聖俞文

歐陽修

昔始見子伊川之上子仕方初子年亦壯讀書飲酒握手相歡談辯鋒出賢豪滿前謂言仕宦所至皆然但當行樂何有憂患子去河南子貶山峽三十年間乖離會合晚被選擢濫官朝廷薦子學舍吟哦六經子才過分可愧非榮子雖窮厄日有聲名子狷而剛中遭多難氣血先耗髮鬚早變子心寬易在險如夷年實加我其顏不衰謂子仁人自宜多壽子譬膏火煎熬豈久事今反

此理固難知況於富貴又可必期念昔河南同時一輩  
零落之餘惟予子在予又去我予存兀然凡今之游皆  
莫予先紀行琢辭子宜予責送終恤孤則有衆力惟聲  
與淚獨出予臆尚饗

祭范潁州文

王安石

嗚呼我公一世之師由初迄終名節無疵明肅之盛身  
危志殖瑤華失位又隨以斥治功亟聞尹帝之都閉姦  
興良稚子歌呼赫赫之家萬首俯趨獨繩其私以走江

湖士爭留公蹈禍不慄有危其辭謁與俱出風俗之衰  
駭正怡邪蹇蹇我初人以疑嗟力行不回慕者興起儒  
先酋酋以節相侈公之在貶愈勇為忠稽前引古誼不  
營躬外更三州施有餘澤如醜河江以灌尋尺宿賊自  
解不以刑加猾盜涵仁終老無邪講藝絃歌慕來千里  
溝川障澤田桑有喜戎孽獗狂敢齟我疆鑄印刻符公  
屏一方取將於伍後常名顯收士至佐維邦之彥聲之  
所加虜不敢瀕以其餘威走敵完鄰昔也始至瘡痍滿

道藥之養之内外完好既其無為飲酒笑歌百城晏眠  
吏士委蛇上嘉曰材以副樞密稽首辭讓至於六七遂  
參宰相釐我典常扶賢贊傑亂冗除荒官更於朝士變  
於鄉百治具修偷墮勉彊彼闕不遂歸侍帝側卒屏於  
外身屯道塞謂宜耆老尚有以為神乎孰忍使至於斯  
盖公之才猶不盡試肆其經綸功孰與計自公之貴廐庫  
逾空和其色辭傲訐以容化於婦妾不靡珠玉翼翼公  
子樊綈惡粟閔死憐窮惟是之奢孤女以嫁男成厥家



孰埋於深孰缺乎厚其傳其詳以法永久碩人今亡邦  
國之憂矧鄙不肖辱公知尤承凶萬里不往而留涕洟  
馳辭以贊醪羞

祭東向原道丈

王安石

嗚呼東君其信然邪奚讐友朋奚怨室家堂堂去之我  
始疑嗟惟昔見君田子之自我欲疾走哭諸田氏吾縻  
不赴田疾不知今乃獨哭誰同我悲始君求仕士莫敢  
匹洪洪其聲碩碩其實霜落之林豪鷹雋鷗萬鳥避逃

直摩蒼天躡馬僅仕后愈以困洗藏銷塞動輒失分如  
羈駿馬以駕柴車側身墮首與蹇同窮命又不祥不能  
中壽百不一出孰知其有能知君者世孰予多學則同  
游仕則同科出作揚宮君實其鄉傾心倒肝迹斥形忘  
君於壽食我飲鄞水豈無此朋念不去彼既來自東乃  
臨君喪閔閔陰宮梗野榛荒東門之行不幾日月孰云  
於今萬世之別嗟屯怨窮閔命不長世人皆然君子則  
亡予其何言君尚有知具此酒食以陳我悲

祭魯博士易占文

王安石

嗚呼公以罪廢實以不幸卒困以天亦惟其命命與才  
違人實知之名之不幸知者為誰公之閭里宗親黨友  
知公之名於實無有嗚呼公乎公志如何孰云不偕而  
厄孔多地大天穹有時而毀星日脫敗山傾谷圯至其  
壽夭尚何憂喜要之百年一蜮以死方其生時窘苦囚  
拘其死以歸混合空虛以生易死死而不祈惟其不是  
生者之悲公今有子能隆公後惟彼生者可無其悼嗟

理則然其情難忘哭泣馳辭往侑奠觴

祭高師雄主簿文

王安石

我始寄此與君往還於時康定慶厯之間愛我勤我急  
我所難日月一世疾於跳丸南北幾時相見悲歡去歲  
憂除追尋陳迹淮水之上治城之側握手笑語有如一  
昔屈指數日待君歸艤安知彌年乃見哭庭維君家行  
可謂修飭如其智能亦豈多得垂老一命終於遠域豈  
惟故人所為歎惜撫棺一奠以告心惻

祭吳侍中冲卿文

王安石

嗚呼公命在酋長我一時公先我出我後公姜中間仕  
宦有合有離後我所踐公輒仍之出則交轡處則連棖  
坐時則並行肩則差豈願敢及天實我貽公之停蓄及  
所設施有誥有誄亦有銘詩又將有史傳所不疑我既  
憊眊句辭能為婚姻之故惟以告悲

祭周幾道文

王安石

初我見君皆童而憤意氣豪悍崩山決澤弱冠相視隱

憂困窮貌則侔年心顏如翁俛仰悲歡超然一世皓髮  
鰥馘分當先弊孰知君子赴我稱孤發封涕洟舉屋驚  
呼行與世乖惟君繾綣弔禍問疾書猶在眼序銘於石  
以報德音設辭雖徧義不愧心君實愛我祭其如歆

祭虞靖之文

王安石

剛耿直諒醇明博美敢於為義我實知子達我所願窮  
吾所恥柰何終窮命也天只前年僕馬來自田里白顛  
夷馘相見悲喜輸我肝膈莫逆其避衰老避逅綢繆山

水念我難繼庶今少止翻然為辭遂隔生死寓哀一酹  
嗚呼已矣

祭李審言文

王安石

嗚呼嘻公之才豈獨我知公數困厄豈人能為所畸乎  
人豈能無疵所侔乎天我乃知之交不就利高明所忌  
泣不失宜孤寡所思凡今君子疚實在茲公亦如我如  
我公知厥交淡如惟正無私哀今亡矣侑醊以辭

祭刁景純墓文

蘇軾

嗟我少君四十二歲君不我少謂我昆弟今我已老鬢  
鬚蒼然君之永歸不為無年我獨何憾過期而哭人之  
云亡哀此風俗涉江而東宛其山川顧瞻萬松蔚乎蒼  
半尚想松下幅巾杖屨迎我於門抵掌笑語豈其忽焉  
歛茲一墳俛仰空山草木再春平生故人幾半天下紛  
然日中掉臂莫夜我非至人心有往來斗酒隻鷄聊寫  
我哀尚饗

祭歐陽文忠公夫人文

蘇軾



維元祐六年歲次辛未九月丙戌朔從表姪具位蘇軾  
謹以清酌肴果之奠昭告於故太師究國文忠公安康  
郡夫人之靈嗚呼軾自齠髻以學為嬉童子何知謂公  
我師晝誦其文夜夢見之十有五年乃克見公公為拊  
掌歡笑改容此我輩人餘子莫羣我老將休付子斯文  
再拜稽首過矣公言雖知其過不敢不勉契濶艱難見  
公汝陰多士方譁而我獨南公曰子來實獲我心我所  
謂文必與道俱見利而遷則非我徒又拜稽首有死無

易公雖云亡言如皎日元祐之初起自南遷叔季在朝  
如見公顏入拜夫人羅列諸孫敢以中子請婚叔氏夫  
人曰然師友之義凡二十年再升公堂深衣廟門垂涕  
失聲白髮蒼顏復見穎人穎人思公曰此門生雖無以  
報不辱其門清潁洋洋東注於淮我懷先生豈有涯哉  
尚饗

祭龍井辯才文

蘇軾

嗚呼孔老異門儒釋分宮又於其間禪律相攻我見大

海西北南東江河雖殊其至則同雖大法師自成定通  
律無持破垢淨皆空講無辯訥事理皆融如不動山如  
常撞鐘如一月水如萬竅風八十一年生雖有終遇物  
而應施則無窮我初適吳尚見五公講有辯臻禪有璉  
嵩後二十年獨餘此翁今又往矣後生誰宗道俗款歔  
山澤改容誰持一盃往弔井龍我去杭時白叟黃童要  
我復來已許於中山無此老去將安從噫參寥子往奠  
必躬豈無他人莫寫我胸

代三省祭司馬丞相文

蘇軾

嗚呼元豐末命震驚四方號令所從帷幄是望公來自西會哭於廷縉紳咨嗟復見老成太姪在位成王在左曰子惇惇誰恤予禍白髮蒼顏三世之臣不留相予孰左右民公出於道民聚而呼皆曰予父歸歟歸歟公畏莫當遄返洛師授之宛丘實將用之公之來思岌然特立身如槁木心如金石時當宅憂恭默不言一二卿士代天幹旋事勢如絲衆比如櫛治亂之幾間不容髮公

身當之所恃惟誠吾民苟安吾君則寧以順得天以信  
得人鉏耒去太甚復其本原白叟黃童織婦耕夫庶幾休  
焉日月以須公乘安輿入見延和裕民之言之死靡它  
將享合宮百辟咸事公病於家臥不時起明日當齋公  
訃暮聞天以雨泣都人酸辛禮成不賀人識君意龍袞  
蟬冠遂以往禭公之初來民執弓矛逮公永歸既耕且  
耰公雖云亡其志則存國有成法朝有正人持而守之  
有進毋隕匪以報公維以報君天子聖明神母萬年民

不告勤公志則然死者復生信我此言嗚呼哀哉尚饗

文章辨體彙選卷七百五十一

欽定四庫全書

文章辨體彙選卷七百五十二

明 賀復徵 編

祭文四

祭十一舅母范夫人文

宋黃庭堅

嗚呼夫人令德孝恭佐我元舅肅雍於宮柔不選悞剛  
不思克誰傳誰師金玉天質螽斯多子扶牀坐膝笑之  
怒之慈視如一夫人歸止不及皇姑事我安康進掖退

挾酒有枕簟溫清起居婦拜姑老尊重則傲猗嗟夫人  
老而克孝誰不淑壽大國楚秦孰是夫人而不中身免  
皆詩書女亦箴絜得喪秋毫彼亦何恤庭堅等來自江  
南哭奠藁葬毀瘠餘生哀深母黨

代范樞密祭溫公文

張耒

嗚呼天祚有邦畀之元龜篤生我公為世父師夷齊之  
清淵騫之德子產之惠叔向之直人擅其一足以成名  
公兼衆德乾乾不寧九流百家金匱石室鉤索沉隱裁



其失得根柢治亂經綸皇極作為文章有書秩秩玄圭  
大裘望之肅然冬陽夏冰赴者爭先仁英兩朝鏗鏘厥  
聲國有正人折姦於萌荏染柔木求直於繩我公盡規  
君心則寧烈烈神考體貌有德公獻有可巖巖翼翼言  
有未用不敢受爵深衣幅巾歸休於洛公則休矣四方  
顯顯君子野人洎於他邦聞風懷歸於父子兄天施不  
齊或怨寒暑公獨何施四海一譽元豐末年國有大事  
穆穆文母宥我神嗣爰立作相媚於神人我公在廷其

重萬鈞士賀於朝民歌於廛農慶於野兵休於邊燠爾  
慄寒養其饑孱無瘠於饑無休於田培其本根枝葉則  
茂豈曰我作憲章惟舊於赫聖考左右上帝休公於家  
實遺聖子卷耳思賢夙夜周京不惑不疑成此太平公  
之去來人之戚嬉人之戚嬉帝之從違豈人事耶天實  
為之純仁不才辱公之深人之相知貴相知心惟公我  
知洞達表裏采其所長謂或可使申結義好丘山不移  
匪我則然公實取之泚泚清洛獨樂之園嘉華春敷脩

竹夏寒清酌脩然我招我從琅琅嘉言有銘在躬朝偶  
乏人備位樞機入與國論獲親風規六七年間為益不  
貲私祈白首從公以歸憂勞傷生公既進疾庶幾有瘳  
卒相王室國祠既誓公以喪聞我心之悲不獲至門入  
哭於室公既大歛終天之情不一見面人生有死抑旦  
夜耳曾子將沒知免而喜公身既修公志既畢既壽令  
終無有其失有如公者古今萬一任重道遠稅駕茲月  
庶幾念此以紓我悲猶有鬼神實聞我辭

國子監祭司馬溫公文 晁補之

維元祐元年九月日具官某等謹以清酌庶羞之奠致祭於故丞相司馬公之靈曰嗚呼公乎寬粟柔立根於明誠進禮退義世為重輕千乘不居古稱好名公乎不然志合則行布被脫粟他人為詐公乎不然則以身化公臥洛師閉關却掃深衣講道將以是老公歸朝廷路車乘馬扶攜襁負民拜於野聖母神孫在宮載祗公率其官正人具來誠心行義令出而聽國安九鼎大勢已

定民以法治法勝則煩譬如魚噉則清其源賣刀綠畝  
盜豈得發苟無欲之雖賞不竊裴公處內如不勝衣問  
其貌年威行四夷楊公入輔曾未幾何毀第減騎人去  
其華忘身憂國晚以骨立生非其厚所愛民力有來遠  
縣廢食與言問民而沒反席未安帝祇合宮公薨訃聞徹  
尊往臨追昨故溫公薨李炆甲戌暮雪民憂歲寒相諺  
未褐聞諸道路信有斯言曰公在天胡俾我寒以勞定  
國人曰宜享何以知之家有公像生為民望其沒亦神

公乎何憾悲者世人尚饗

祭大資政李公文

晁補之

維年月日門生具位晁補之謹遣人以清酌庶羞之奠  
致祭於故北京留守大資政李公之靈曰王跡之熄詩  
亡不嗣春秋又微戰國橫肆惟其可者尚與聖鄰詞出  
其口輪囷郁紛觀左氏言何國無士馳其戎車陳詩說  
禮秦儀賣國斯廼燔書韓非孫武是固非儒至其文字  
孰敢貶諸漢興息民殘編出壞經儒詞士學自此派班

王兩馬河漢奔渾胡不及古華勝其根乃獨揚雄為書  
準易易不可準相如是式却後得唐纔一韓愈蹀魏踵  
漢侵尋千古宋以文治百七十年壞儒偉士軼古並肩  
公以文鳴起河之北如彼神鳳雲翔覽德惟我神考文  
王之文謂公所作經誥是羣官名用正禮閣其脩此公  
餘事粵有大猷論秀百人宥死四千人車上儻而公退  
然輔弼三朝時異操同幾顛者數不自為功上建皇極  
以消羣疑歛時五福惟公助之爰開大公旁作穆穆九

闕畫靜縈縈士復惟古良臣善則稱君造膝之語家人  
莫聞嗚呼哀哉匪歲龍蛇正月己卯賢人之憂庶氓是  
悼嗚呼哀哉補之昔者自魏祖京公以其名上之朝廷  
羈堅附夷千里為輕顧慙幽介丈采安有無鹽刻畫祇  
增其醜士報知己匪以其私潔身有義尚畏人知惟不  
仰愧神其聽之嗚呼哀哉天不勲遺而喪宗工胡床昨  
夢過雨驚風燕子穿閣池臺半空嗚呼哀哉安陽之吉  
遠不臨壙扁舟東下形以神往寓辭千里以侑洒尊庶



平生言公猶我聞嗚呼哀哉尚饗

祭韓無咎尚書文

晁補之

兄之初載甚躋而艱逢亂客吳萬里孤騫文方日衰蕩  
為狂瀾組織纖弱各自謂賢士晚莫救兄勇而前陋巷  
一室日旰未饘誦書鼓琴志操益堅落筆天成不事雕  
鏤如先秦書氣充力全壯年相從顧憫我孱曰是有志  
許以周旋我自蜀歸兄典三銓邂逅都門挈手歡然兄  
牧東陽我走閩山曠不相值今五六年我病早衰顧未

及泉兄之壽康一朝先顛餉酒踵門乃酌柩前嗟嗟造物孰尸此權豈其好惡亦與俗遷微官有守喪車莫攀尊鯽之奠叙訣終天

祭范忠宣公文

陳瓘

昔文正公在仁祖時忠於謀國衆正所依心虛而明照了不疑先事而慮有如著龜兩遭勅榜益奮不移外禦元昊數蹈禍機國勢既安奚恤我危考公行事允也似之安不擇地難不敢辭至於言兵則曰不知豈曰為異

各遵其時不述其跡是乃無違三年遽改生事者誰蔡  
相南行公獨救之一勝一復其兆在茲公可以默又進  
忱辭人亦有言公爾忘私孰能臨義捨安取危一斤四  
年育廢始歸天子哀憐拜命涕洟其心不育意欲有施  
人願公留為帝寵夔病不能對人所歎咨天子曰吁疾  
尚可為錫以上劑臨遣國豎丁寧訓飭速療勿遲云何  
不淑竟止於斯嗚呼哀哉公果已矣舉世思公公不來  
矣人之於公有合有睽聞公之歿睽者亦悲情隔生死

公論乃出悲公之人始自今日臨終不昧恐死有述小  
其一身大我王室置小恤大自初訖終可使聞者勸而  
作忠太宗征遼喬苑不忘心之所慮奚獨一方願惜生  
靈願合朋黨願為宣仁一洗誣謗願正其事願辨其人  
願以中道行帝之仁嗚呼哀哉言惟心聲孰無此聲孰  
有此誠神器雖大如人之形愛養胃氣可以保生陽明  
之經徧於四體呼吸之間無有不差在絡連右首脉應  
趾中經流行寧有定位彼執一者棄異取同異我曰偏

同我曰中語各有心心各有物孰能審是而不彼恤公  
獨有言繼者誰乎公薨我悲豈緣葭莩公昔南遷我在  
北陲側身以望心往從之及公之還我有言責陳留雖  
近欲往不得平生想慕獨未識公見公之心何必形容  
丈正沒後公又亡矣仲季方興公復有子其門益大其  
道益光公可無憾我亦奚傷

祭幻住菴明師弟文

釋德洪

予少棄家從我游嬉三十一年如夢頃時於此夢境夏

患半之我竄萬里白骨重肉子臥一菴亦失雙目心知  
餘年再見不復敢料來歸先館子廬即視模索認聲驚  
呼我亦念子形神已枯百不如人謂當壽考心期惻然  
正爾難保如臨崖樹先自枯倒不見兩月果以訃聞既  
通世契久同師門臨終之語骨湏我焚攜法兄祖疾馳  
三日瓦燈晝昏寂然空空相視以慟薦此鉢食

祭潘叔源丈

陳亮

惟君讀書將以為善而不主於祿利應舉將以行義而

不志於必得鮮衣美食以償男子有家之願歌童舞女  
以終人生行樂之期禮義以悅其心朋友以助其德內  
外並進心跡無瑕此宜閱世之滋多而亦降年之止此  
兄弟相從而去各適所安兒女攀慕無從亦將有立亮  
蹉跎莫景邂逅飄零白飯青芻舊游何在隻鷄斗酒老  
淚如傾歎逝者之斯夫知吾生之永已臨穴不及遡風  
而號

祭高永州文

葉適

先后聖德天報其門何以報之維材與賢替笏之腴而  
自陶冶不以師教有如公者靡驕曩貴靡羞後貧銖廉  
黍約以標厥身官糞弗昭知亦非少薦聞實多不用竟  
老眇然零陵併重奪之理不可推通人所疑我慚素賤  
廼辱公女手擇寒蔬相與敬處公歸自洪我屏西山瘦  
馬獨來共談草間我疾異甚遲旦暮死公今忽先視我  
餘幾以義當哀以情當悲昏塞我衷不知施為又失我  
思無復昔語彊寄茲觴公酌勿吐



祭陳同甫文

葉適

嗚呼同甫氣足蓋物力足首事天所畀也孰可抑制以  
智開物以機動事學而得之又相比攸載書以來糾結  
披籍解剥闔闢遇其殊特著於詞章無後無前啟塾滌  
醒獨為時先補空續高扶英植豪探海取鼇惟已所操  
回視世人磨細研精俯墨仰繩用影律形視人而行服  
勞終身俎豆僅列我漫一奏韶壞雅闕嗚呼同甫絕代  
之寶衆豈同美抵擲棄捐亦其常理子重受禍嘻又已

甚寓矢以攻殺者無禁脫廷尉械為進士頭天子第之  
始莫我尤謂天弗省天乃終定謂天既定而弗永命嗚  
呼同甫心事難平寵光易滿萬世之長一朝之短余蚤  
從子今也變衰子有微言余何遽知畏子高明痛子懽  
悴鑄嗟無勇和隨有罪子不余謬懸俾余銘且曰必信  
視我如生疇昔之言余不敢苟哀哉此酒能復飲否

祭周益公文

陸游

某紹興庚辰始至行在見公於途欣然傾蓋得居連牆

日接嘉話每一相從脫帽褫帶從容笑語輸寫肝肺隣  
家借酒小圃鉏菜熒熒青燈瘦影相對西湖弔古並轡  
共載賦詩屬文頗極奇怪淡交如水久而不壞各謂知  
心絕出流輩別二十年公位昂昂我方西游荷戈窮塞  
歸得臺郎旋又坐廢公又策免久處於外見不可期使  
我形瘵斯文日卑公則崧岱士昏於智公則蒼蔡公老  
不衰雷霆百代每得手書字細如芥痴兒駭女問及瑣  
碎孰為一病良醫莫差赴告鼎來震動海內奔赴不遑

涕泗澎湃豈無蓴鯽致此薄酌辭則匪工聊寄悲慨

祭翁殿撰文

劉子輦

堂堂老成國之龜玉進則光朝退斯美俗天其靳耶奪  
之何速嗚呼哀哉惟公之質嶽重海渾學窮古書道通  
聖門本朝取士科張甲乙偉人巨公皆此塗出公亦欣  
然飛聲騰實賢俊之闕圖書之囿孰游其間惟德之懋  
公亦欣然來為領袖紱垂流來軺光遠時以外移為  
仕之蹇公亦欣然屢膺臨遣愠絕三已榮輕九遷浮雲

卷舒何往不安公亦欣然老於祠官惟公行藏曰有義  
命物智時機無心而應藥笈探玄麟經纂聖得意忘年  
怡然處順惟我小子與公同鄉交舊年契奕葉有光晚  
獲從公素心始償見必我留宴笑坐傍公雖病矣神氣  
內強袖手不言色惠滿堂大化密移遠游不復壽格睟  
容悶於一木楚些徒招秦詩莫贖設醴陳有文以相之  
誠可達幽公其亮之

望祭文丞相文

王炎午

相國文公再被執時予嘗為文立祭之已而吉水張子  
載心弘毅自燕山持丞相髮與齒歸丞相既得死矣嗚  
呼痛哉謹痛望奠再致一言嗚呼扶顛持危文山諸葛  
相國雖同而公死節倡義舉勇文山張巡殺身不異而  
公秉釣名相烈士合為一傳三千年間人不兩見事謬  
身執義當勇決祭公連公童子易簣何如天意佑忠憐  
才留公一死易水金臺秉氣捐軀壯士其或久而不易  
霜雪松栢嗟哉文山山高水深難回者天不負者心常

山之髮侍中之血日月韜光山河改色生為名臣死為  
列星不然勁氣為風為霆干將莫耶或寄良冶出世則  
神入土不化今夕何夕斗轉河斜中有光芒非公也耶



文章辨體彙選卷七百五十二



欽定四庫全書

集部

文章辨體彙選卷七百五十三至五十五

詳校官中書<sub>臣</sub>李采

主事銜<sub>臣</sub>徐以坤覆勘

總校官檢討<sub>臣</sub>何思鈞

校對官中書<sub>臣</sub>高 中

謄錄監生<sub>臣</sub>施 華

欽定四庫全書

文章辨體彙選卷七百五十三

明 賀復徵 編

祭文五

祭太史公文

明方孝孺

丁巳之春公歸金華六月載途公歸於家公曰美哉子  
來孔時斯文有傳非子誰宜我觀海內亦有作者非言  
之難知道者寡古人為學惟道是明緊我望子豈以文

名拜公之言服公之德從公三年忘寢與食公曰卓哉  
才器之奇加以歲年吾且畏之孰俾師友傳之子孫意  
欲甥我以承其門歸告祖母祖母不可吾老娶婦欲其  
事我道路阻邈其歸無期且貴非偶汝固以辭此言未  
聞公家遘難聞之涕泣夜不能旦百口徙蜀與戎羌隣  
重走金華謀公弟昆欲往省公中以故止祖母速歸得  
娶閭里遲之三載勉以從死生莫知以此負公公之  
為教必本禮義違親絕俗固非公意公今薨矣我存何

如所肯忘公有如江河公之道德未白於世公之文章  
幾與公逝思公體貌尚寓於夔哀公子孫桑梓是懷闡  
之雪之俾大以光導之扶之使之大行告於天王迓葬  
以禮脫其羈縻使復閭里或周其難或開其昏凡力可  
為不忘公思第愚不肖弗敏為學天容地負懷公奧博忠義  
大節道德大原庶幾努力法古聖賢公之望我蓋將在此天  
未可期心則已矢公神在天亦我之思我辭告公寧不我知

同年祭傅文穆公文

李東陽

嗚呼鄉有先達國有舊臣培養成就代不數人公之文章演迤瀾淪公之性行縝栗溫純詞苑毓秀卿曹致身功在啟沃業存經綸地占台斗望隆縉紳游鵬始運屈蠖方伸中道傾逝天胡弗仁友朋之義休戚實均共期僇力以贊化鈞公今棄我孰與為鄰昔我同年如木向春今我同年若星在晨嗟公已矣寧不傷神執紼而餞玉河之濱目送行旄心隨去塵與公永訣涕淚盈巾

祭張守天澤文

崔鉞

子之司財其白如霜子之摧強其堅如鋼既左其秩年  
亦弗長可能者性不均者命性以力成命因氣競嗟嗟  
天澤於子何病於乎哀哉尚饗

小祥祭妻文

崔銑

子逝一歲子憂百端顏色忽悴髮毛益班自子歸我閱  
年三紀精力小心靡愆可指子事我父子事我母喜則  
勵勤勞不言苦操刀治膾紉箴縫衣姑喪相予執禮無  
違唯子事我敬如昆弟鍼規朋友情好伉儷自子之亡

孰察予衷言則誰商行則誰同予父望九子年及艾中饋豈宜子之不在為子服齊條焉及期中心之悼曷有已時世之類矣虐煽後母義慕子興惑戒吉父嗟嗟吾妻其安冥冥傷哉痛哉涕而雨零

祭岳母文

何景明

嗚呼惟我岳母慈懿為德勤儉成家既獲既食不驚子華爾女既亡我翁既逝服艱茹辛晚也誰濟昔翁之亡我送其喪今母之亡我適來鄉臨風醺觴臨河執紼死

生俯仰哀來慟哭

祭太傅文正謝公文

屠應埈

嗚呼於皇純祐實生哲人英英文正邦家之楨承休邇  
否玉振金聲弱冠厲翼純皇是嘉清問克揚天休薦加  
奉轡儲皇羽儀承華協贊三善仰培玄德穆穆潛光萬  
邦僕武帝出於震兌懷厥功崇崇天樞簡茲登庸於穆  
元化斟之酌之王言作命佐時若之維帝聖哲任賢勿  
猜萬幾芬如疇咨弼諧文華肅清戔戔平臺帝穆在中



召公其來于時三公惟劉惟李實維雍雍偕侍宸扆惟  
曰股肱亦曰心膂聽履則識造膝則喜嘉謨帝俞衆則  
莫聞道洽政宣日惠於民休茲三公推賢有容明明卿  
佐濟濟百工惟帝聖哲亮工敦裕中朝休明四海咸乂  
昊天降威感我顯休於穆敬皇邁疾彌留乃召三公末  
命是宣玉几用憑金滕啟緘時維武皇誕膺天序彼閹  
伊何敢奸國紀公曰嗟嗟維邦之忒邦縣典刑其致恒  
辟諫書載陳帝始弗違亦有讒人啓之禍階維閹論譌

播時天威李曰異哉維裕克勝二公曰吁先皇有命我  
躬受之母敢顛隕公言益莊闇日以昌劉公北徂歸公  
南荒振衣姚山濯纓虞江位黜志伸身逸譽張英英名  
胄錮及孫子滔滔東山歸逾二紀維皇中興登賢晉明  
皇曰迈公復之台衡明明綸命肅肅安車行人將之曰  
馳以驅衆曰其辭公曰就途老臣抗命時予之辜我公  
至止皇命煇煇國有壽考士有儀刑衆曰其留公曰歸  
哉年不逮志居功履危出以恭令歸曰行義皇恩不愆

始終允備訃音自南廼徹帝聰帝曰嗟嗟是維宗功乃  
名冢宰宗伯司空錫之冢田崇丘隆隆祭以天章靈謚  
休封明明敬皇陟降在天公拜稽首庶無覲顏敦節完  
名範世作則民載德音史紀成績緬予門墻喬嶽具依  
南望玄廬山川間之眷言秉紼繫此簡書暮觴薦藻如  
哀陳詞

祭鄭虔州文

高叔嗣

在昔先民惟名與位苟取其一莫兼其二自非大雅孰

能兩至淵哉府君曠世高視先朝弘治時維休明俊乂  
四集偕應弓旌試宰洪洞民嬉政成郡國交舉天子是  
徵歷位司徒撫翼皇庭處煩不厭在衆能澄乃守平涼  
既踐於夔寵命亨嘉紫授命龜川流兩潤惠政旁施四  
民勿擾二郡咸宜邦降褒禮人興頌詩君子有行與時  
舒卷耄老引年稱疾自免中林放達故里偃蹇古人高  
蹈方公則淺慶發厥門教成維子仲繼地官伯登御史  
如珪如璋令聞不已璽書攸嘉爵服改增公拜於家帝

命再承履道不愆考德斯馮庶幾鄉國永觀典刑天不  
遺老如岳中崩嗚呼哀哉某等忝接封壤詞人之友禮  
弗登堂慕德永久追誦光烈雖沒不朽望遠陳辭興哀  
稽首

祭萬古齋文

唐順之

庚寅之歲余客陽羨公來顧余實始識面識面之初遂  
以知心朱絃白雪相與賞音惟公老成行方志古余也  
何人自知疎鹵豈足裨公辱公節取過則相規善則相

許一日過余奉幣以告余有二子煩君教詔佛廬仙洞  
水曲山窈攜壺擔盒與余相邀花木玲瓏禽鳴啾啾流  
目傾耳永日游遨或時閉門坐對一室竒文共賞疑義  
與析清言不足或繼以奕晨飧相逢忽言日昃余有所  
往不告於僮僮來相尋知必在公公命家人為具客食  
家人不問知余為客綢繆往復踰四五年曾無一日曠  
不周旋公訓桐廬余赴宮寮心豈不邇其地則遙逮公  
解官余亦屏居握手一笑歡言如初通家之誼婚媾自

此公有孫女以字吾子朋友或言師生之拘公曰何傷  
古有蔡朱尚期白首賴公劇勵公不我留忽焉厭世屬  
續以前神氣清晶顧謂二子事豈有了荆溪山水昔陪  
公游余今復來愴公其休死生常理抑又何怪不敢負  
公恃此心在與公二子敢忘切磋尊聞行知矢言勿磨  
窀穸在茲舉我觴奠叙往悵今公其我鑒

祭孫南野太僕文

唐順之

公之先人以侯樹勲侯雖不嗣猶大其門數世之後遂

以儒顯顯惟邁跡亨衢是踐人皆謂公出自紈袴公之  
居官一如寒窶馬羸皮敝何履之素約已奉法繩地而  
步問公之官囊無餘蓄問公之家亦有夏屋公瘠於官  
不繫其家晏嬰鉅族豆無掩玃公裕於家不繫其官子  
荆居室苟合而完刑曹郡守外臺太僕孰云宦成節則  
愈確公無渝節衆有好醜一忤於世自反何疚欣然歸  
來燕居恂恂室無姬侍庭無雜賓尤避名勢道遙角巾  
鄉人見之不知貴人余辱於公爰締婚媾婚媾則新交誼



則舊兩家相望里閭之間匪朝伊夕載往載還余厭紛囂  
公耽恬寂真率之會兩心莫逆方期與公共保歲寒胡  
奪之速忽焉蓋棺公之云亡論在鄉評請祭於社曰鄉  
先生死而不朽公則何憾老失良朋能不我歎表公之  
墓豈足彰公庶無愧詞僉言實同春還隴樹公窆有期  
陳此薄奠文以侑之

祭陣亡張游擊文

沈鍊

嗚呼哀哉張公之死乎吾得不慟哭而深悲維天有柱

維地有維而所以柱天維地者舍忠義其奚為奸臣執  
柄網紀大虧敵寇陵負若欺小兒三軍望風不戰自疲  
外通賊賂內結權私社稷之計蕩於霜枝割人為虜奪  
馬自資報功欺主曾無愧辭將軍初來意氣恢恢言念  
國恩流涕滿腮口諭三軍執挺持椎此行竭力有去無  
回攘臂渡河奮呼登岸受刃良多殺傷過半力屈勢窮  
精靈不散天發震雷來斥敵患亦有官軍屯聚若雲按  
兵不動誰為救焚我亦有生汝亦有死何其忍心晚而

無泚張公雖死神氣長生諸將雖在奄奄無聲汝不忠  
義知有權貴權貴行誅汝骨亦碎先死為榮後死為辱  
生辱死榮其辨如燭汝不自力欺君誤國荼毒生靈為  
鬼為蜮不輯其徒不恭其職所過騷然大為淫慝張公  
有靈誅此逆賊逆賊不誅伊何為德某等流離不在其  
位敬公哀公有霰涕淚憂國愛君懷仁慕義醵金為饌  
選辭為翰臨風長號痛徹霄漢

祭李于鱗文

王世貞

嗚呼惟子文章珠藏玉府示世模楷為明粉黼獨立熙  
臺子歌余舞炳烺長夜追琢萬古余所心悲鬱曲齟齬  
千二百言亦足以吐其未竟者酹而告汝昔署爽鳩從  
若風虎為郎序遷不隔跬武清霜晝粲白日宵炬子前  
西逝余亦東邁高揭二華差我岱泰黃河其間炯一衣  
帶玉女騰噏海若橫睂子之挂冠鳳矯鴻鸞余嗣解組  
屈蠖哀蟬清泌衡門其跡則然所不接席徂垂十年聖  
人中興纁帛交賁子時皤然顧我色喜當為女先女其

強起余謝不可子曰毋爾疇族女讐疇燭女幽德不思  
報節士所差女以佚歸造物所讐雪涕而冠實惟子謀  
旬宣於浙從子之後汴繡子被晉斧余授太白配月俯  
視列宿雲物睥睨風雨潺憊子之詰妣悠然見遺扶服  
脩途弔影總惟小人有母能不攢思美疾朝聞夕而拂  
衣奎壁瞻翳滄波竭涸忽傳子耗既疑且愕曾未面睫  
家禍亦作髓淚駢枯肝腑寸鑿嗚呼哀哉人生鮮懼惟  
事父母生我知我爰及朋友一旦盡矣膚立同朽惟余

與子匪但三益薄祿微聲以逮休戚凡子先驅余必偕  
植子今溘然視我若捐余獨何恃而能久全余復何心  
而游世間子困尸讒予困人言存者受憎沒者受憐嗚  
呼哀哉惟昔濟上坐而丙夜執手浩歎誰為來者尼晞  
睽則軻周分駕邈爾漢季為兩司馬不聞揚扆以紹謨  
雅蘭金協契山水齊徽惟余二人開闢所希浮生如寄  
胡能不歸金石可泐榮名庶幾言猶在耳其人已非嗚  
呼哀哉子之遺孤駒而汗血子之遺編家傳白雪有承

相在戚若昆弟二三友生其進未已素車雖香班管蜚  
紀人誰無死子死可矣嗚呼哀哉尚饗

祭俞仲蔚文

王世貞

維萬曆七年己卯秋八月癸酉朔越三日丙子俞仲蔚  
先生卒其又六日癸未友人王某始能以酒炙羹飯往  
奠而哭之曰嗚呼仲蔚天與之隱俾辟世塵天與之丈  
隱不就淪天與之貧俾滌世態天之與德貧不見憊天  
與之藝輔丈而行天與之友翼德以稱凡子之羸皆受

之天其不知者以為嗇焉有子而痼有媼而衰有孫而  
孩有女而嫠人所言嗇嗇于目前吾所謂贏則千萬年  
在漢恬冲無若叔度微言蔑聞胡以殆庶在晉藻雅玄  
晏先生未究八法墨池隤聲子之子詩上窺建安盡洗  
色澤天骨巉嵬其于他文單辭輒工行為賦誄亦表春  
容子之於書愈小愈妙柳骨褚姿鑿山陰竅稍縱而行  
襄陽米顛強弩斫陣免駒嘶烟與子劇談耳不盡酬稍  
出片辭確乎陽秋入子斗室春風藹然雖適閑閑心遠地



偏子之間左干旄時溢及乎公庭曼絕子跡皂帽蒙頭  
隱囊底肘手綴目營圖左書右徐淪清莽時進甘果調  
鸚聽鶯日以自課六合之外子或冥思一室之外子不  
與知營衛精堅可永無敗如何一疾遽爾長夜嗚呼仲  
蔚吾昔進子以交子與自是三人遂成爾汝徐生汎愛  
惟子是篤慙懃分素嘗疊推轂徐之不祿子後我先入  
雲痛哭拊棺一言寔窆之期為樹豐碑我文子書曾未  
移時子亦告逝誰為終此二子之貴俱在後死月晦叩

門子病向欲回眸眄我以臆誰謂一睽地老天荒  
遺骸在木遺文在牀他所不能能使不朽所不終事有  
如此酒嗚呼哀哉

祭汪文學文

汪道昆

嗚呼哀哉茂陵倦游長沙官薄亦覲昌暉邁此焚錯吁  
嗟先生洵美且碩高距擅場大雅可作丁年任俠節慕  
朱公存老夷門結客屠中周南削迹脫躡素封言歸舊  
服北面儒宗乃睠神皋投趾天目禹穴窮探具區肆矚

陳寶收華和珍韞積長者下車髦士推轂爰自末路作  
貢澤宮周游鄒嶧允陟岱宗燕臺購骨易水歌風躡屩  
金馬獻畫盧龍乃召公車奏厥長技天子曰都覩茲鉅  
麗煌煌上京濟濟良士往哉汝諧敬敷教事桓桓直指  
戾止宮牆薦紳有楚籩豆孔將若操槃筵爾授圓方彼  
都有造緊爾之良徒倚橋門屬厭蔬食嫖節翩翩英聲  
籍籍常伯分庭相君下席同氣雲從石交景集華顛朝  
市因翼天衢曳裾華閭撫劒修塗濡首胥溺卷舌罔呼

獨行負俗風於懦夫七稔課功百里奮鐸胡官之拙胡  
地之惡涿鹿奧區我心孔樂習靜蓬戶濫巾雲壑部符  
甫下天命難堪云胡豎子殲我吉人夷體傳舍歸骸私  
門悲纏鄉曲悼動宗祊嗚呼哀哉瓦缶喧阗鍾呂委歆  
唯公嗣徽逢時之闕窮愁著書聊以卒業芳猷永謝令  
緒中絕豈無牖下飾巾待期蕭蕭哀挽望望靈輶戒塗  
郊外即窆澁西來芳可述往駕莫羈嗚呼哀哉

同年祭陳封君文

歸有光

嗚呼乙丑之歲登於南宮吾邑四人鄭州為榮言念生  
我高堂半空鄭州二親祿養獻隆於維府君世承文學  
其祖博士卓為先覺授文省中所得卓犖府君傳業遭  
時齷齪以遺令子方發其璞行行於食珪璋有渥於乎  
人之生世何者能全傷哉貧也每食泣然府君於子歟  
見高軒天若厚之又靳其年悠悠江水有鬱新阡葬以  
大夫亦顯孝賢嗚呼尚饗

祭顧文康公夫人文

歸有光

嗚呼女婦之職不出閨中及其崇貴與皇家通維文康  
公大科奮跡四十年間遂躋崇極富壽康寧當世所少  
夫人配之與之偕老赫赫我皇統一聖奠考禮肆樂制  
作紛紜既秩殷典百神咸侑文康雍雍在帝左右倚歟  
夫人象服是宜朝於兩宮從后之居大室穆穆佐上冊  
寶金章玉牒夫人是導西苑撫撫庀其贊事鞠衣翟車  
夫人則侍邈然千載大禮曠墮夫人際之見所未覩匹  
婦之微一命為多有美夫人如山如河生有誥命一品

之貴薨有奏訃賜之葬祭潭山之原從文康止天子之  
賜恩榮極矣凡厥富貴莫不有終維我生人誰能不恫  
尚饗

感夢祭嫡母丈

徐渭

惟母在昔以病而死胡昨夕夢不死而病裸坐室隅展  
戶自掩兒疹其侯呼涕激面脉數以煩知不可理詭曰  
其愈須旦夕耳掩面痛哭扶母於牀哭罷而覺泣涕猶  
滂夢母於病哀且不禁覺哀其死免何為心

祭三高士文

陳繼儒

辛丑歲三月十六日檇李人宋旭支杖來自天馬山之東麓同里人宋茂觀陳繼儒衲子蓮如慧解摘溪毛沽村醪并陳所藏廉夫鐵冠拜奠於三高士先生之墓曰  
嗚呼衆基累累堙山塞谷先生之宮尚衛樵牧來奠一觴春草空綠異代知己慰而幽獨

祭湯若士先生文

黃汝亨

嗚呼湯公才高跡削詩能窮人文憎命達昔在文人才



不盡同漢魏代興異曲同工我明作者北地為雄七子  
狎盟時流趨風濡沫拾瀋其波如馳疇無眉目乃不自  
施嗚呼湯公大方長笑睥睨千秋自闢堂奧英靈鬱秀  
尊古得道大雅擅場好辭絕妙單言霏霏大言浩浩名  
流寓宇垂光分照嗚呼哀哉余自孝廉託君聲氣已令  
鍾陵得交君臂片語宣心一變知味論古之人談天下  
事高談微言每出人意嗚呼哀哉余今之來君乃騎箕  
亦有山水誰則牙期萬事一棺空名爾為嗚呼世人死

亦其常造物忌名公名乃當惟三不朽孰與文章是物  
最神存而不亡日月經天一視彭殤君去而仙子何以  
傷薦蘋蘩此我饗我將

祭姻家吳廣卿文 貨納賢

嗚呼有吳延陵季子厥壤至德可師謙光是仰乃承簪  
履乃肯堂構曰惟我公徽猷之懋束髮操觚龍躍鳳翔  
既修嫿節復擅青箱胡天不吊早奪公兄父為痛子相  
繼長行形見衣表公孝骨立而鞠子哀而孺子泣將母

以順事嫂曰恭嫂以節著母以壽終公有厥弟亦先公  
隕弟之長男方壯而盡公理其後不啻家辟諸姪視公  
實父而伯公性近道不困於學質直好義玉不掩璞代  
有厚產業乃鉅族無遷拔好無忘穡服非曰讓財積而  
不私瞻貧週乏妻子罔知里有少年窺公倉庫遂有負  
公公知而哂婚姻孔嘉匍匐有喪凡屬激勸必以身倡  
於宗則和於里則美處不愆仁行不越理協躬飭志受  
知長吏郡庭徵辟跡所罕至期薦於鄉期觀於國以舊

以畚根深者植白首窮經志則愈賒佳秋未獲不及春  
華公始就醫視公河上款言達意公為撫掌八月祝詞  
墨濡未乾曾幾何日慶弔波瀾親知心悲悼公隱德見  
則必言為三歎息道途有口誦公弘施聲有餘淚中懷  
悵而生人之戚莫若殞身榮名為寶公為不泯公有三  
女伯仲仙游公視二婿篤與季儔生死異念末世所嗟  
古道自處公之謂耶公有兩男先後膠庠駒齒未落已  
自昂藏不大於身必大於後公之厚積不券自邁爰帝

連駕文白玉樓遂使哲人栢實而秋某等誼比葭莩情  
同肺腑山河邈若人琴如覩有有在孟有酒在卮此詞  
以招精魂鑒之

祭幾兒文

于玉喜

萬厯庚申穀日爹爹以乳麋果餌告於幾兒之靈嗟汝  
生晚值予齒衰余情罕鍾奇鍾汝孩歲週更半蚤慧已  
開玄臚白皙秀質凝瑰門李祈微厯窮慝作命蕃實傾  
瘡痂虛落謁巫弗靈諏醫相剝脆綠迎霜柔紅邁電頰

張欲訣。匪歛還。瞠須臾。色變終古魂。征阿母。叫絕何辭。  
失聲阿爺飲泣。何辭失明。嫡母衆母連丘比冢。寧汝其。  
間或攜或擁。覲於黃泉。慈顏克奉。定益汝憐。曷嫌余寵。  
陌花寄弄隴草。窺臨初逢寒食。幾遍春陰。房幃靜翳。猶。  
虞怖侵。如何棄置。雨薄風林。料數遺裝。文葆具在。竹馬。  
停驅。途車催載。凡涉嬉遊。宛留警欵。觸緒造端。肝膽腑。  
碎。暫飛寸景。長眠尺軀。逐夢歸母。免饑孰舖。乳存石婢。  
懷亡木奴。刈蘭者誰。不亦酷乎。汝兄汝妹。依肩繞足。鸚。

鵠持漿鳳凰採燭汝獨何之楓根夜哭烟濶平岡孤塚  
猶粟栖栖稚魄松檟不分螢迴暝照蝶送晴薰鬼小有  
見人巨無聞彭殤俱妄通士所云薪既火傳孰詮冥香  
金鑲俟微玉佩安兆齋營八關業超六道韶識排雲梵  
天新曉尚饗

祭張子薪文

李流芳

天啓四年甲子二月日張子子薪卒於家友人某時客  
武林淹留至八月而歸始得臨其喪以蔬果致奠而為

文以哭之曰里閨之友昔惟三人最後得子久而益親  
江子邑居吳耕遠郊潘為經師雖通而遙惟子相求無  
間時日一日不見忽忽若失一味之甘一花之開飛書  
相報我往子來子病郊居不能遠涉我數就子時勤舟  
楫屯橋之畔村童里媪指予而言知與子好嗚呼哀哉  
自失閑孟望城悲噓子之遑矣屯橋路絕嗚呼哀哉我  
遊西湖子來別子見子健嗽尚謂無虞豈知生平盡此  
須臾子病數年屢仆而起恃子善病病不能死嗚呼痛



哉今真死矣別子閱月子遣我書期我來歸竟不能須  
知有此事我必不出子行我送非我誰責呼天撫膺吁  
嗟何及哀哉哀哉凡今之人噂沓反側子之直腸如矢  
注的一言非義頭面發赤凡今之人墮獲充詘子之介  
性百鍊剛鐵簞瓢屢空嗟來弗屑嗟乎子新子真道器  
尚有餘習未能度世游玩之物高明所寄子往而深賢  
於勢利天假之年觀其所際嗚呼哀哉凡今之人求多  
於天富壽貴考子孫衍藩諸福之中子無一焉人為子

悲我則不然貧士之常況子能守金高於山營營可醜  
子屋三間為園數畝千花對榻一編在手貧者樂乎富  
貴何有人我之場健者爭先因病得閒乃近於禪藥鑪  
經卷晏坐脩然病之於子良藥福田我躬不閱遑計後  
世千年之謀達者所棄子之無營以子無累去來自如  
夭壽何貳知子曠懷數年於道此言糠粃子能自了我  
嘗語子子神太清舉世混濁擾擾以生厭而薄之殆將  
與櫻嗟乎子薪匪命之窮世濁子清誰能子容撈嚴了

義白蓋真言一詞半句可以通玄子能讀之掩卷瀾翻  
持以正宗凌雲粲然嗟乎子薪生死芸芸如子之死十  
萬一人我猶悍然視息人間眼中無子誰樂餘年我留  
西湖滔滔不歸豈不思家哭子後時巷無居人鄉夢已  
非西湖之上水月林烟念子嘗游寓目無歡百頃風荷  
千章巖桂念子癖花看花欲淚子癖我畫如子癖花我  
腕欲脫子壑無涯長箋大軸釘壁攤几每一咨嗟子病  
若洗嗟乎子薪我子尚在援毫自廢賞音不再從子書

來道子所藏隨子而盡飛去何鄉子盡無靈人琴併亡  
嗚呼哀哉我雖好廣中實狷狹喙長三尺非子莫發子  
不苟同實我畏友今我失子孰攻其咎我於名場每懷  
退志子之所知我已蚤計桃花流水一往千春子今舍  
我誰與卜鄰嗚呼哀哉天不憖遺奪我鄭子又失子薪  
誰能戀此逝將去之適彼樂郊麋鹿魚蝦我將與交凡  
今之人不可以明惟子知我敢告幽冥嗚呼哀哉

祭震女文

沈承

萬曆己未年冬下浣之三日沈承之長女阿震以痘不  
發而殤藁葬北邙之次其母薄氏日稱念梵書資其  
冥福復促作一疏詞筆不忍下也於其三七當薦熟食  
乃為文哭之焚於其所生前跳弄之場曰嗚呼痛哉汝  
名阿震生於丙辰以丙辰字故取震名汝生之初我實  
不喜三十許人不男而女迨汝未期汝即可憐以領招  
汝汝笑啞然當此之時周姬裸汝衣不解帶一夜十起  
飽就姬眠饑就母乳姬因汝故亦幾委曲移濕就乾補

瘡剗肉煩則母瞋省則汝哭昨歲戊午我命不濟頻出  
就試割汝而去周姬既死試又不利歸來牽袖索物而  
戲有汝在側愁亦快意汝齒日漆汝慧日多呼爹呼姆  
音不少訛常手彈門自問誰何我姪來時汝呼曰哥戲  
攪汝物汝竄而波我舅來時汝以衣拖呼聲曰母旋笑  
呵呵汝伯來時作賓主陪擎杯曰請笑者如雷汝祖入  
鄉汝又往蘇經年不直問汝識無應聲曰識白帽白鬚  
汝有外翁一面未曾問客何方即曰北京汝之外姑視

如身生凡三五次挈汝蘇行三更索玩五更索果父母  
留汝汝反不可顧謂我曰阿婆思我今年六月汝有癖  
災我持往蘇挈汝歸來摩娑患處其色甚哀然不敢哭  
恐哭不該每持果餌必窺意旨不色授之不遽入齒每  
所玩弄誤有損傷小目怒之斂手退藏汝母過嚴時加  
櫛束懼汝長大習慣成熟我意亦然但私相囑嬰孩何  
知且隨其欲汝昔在蘇父母歸妻問汝何依欲去何留  
言雖不決意在兩頭頃汝歸斯喜不自持誘汝怖汝假

面作癡小筐提棗矮座啜糜口誦大學手拜阿彌握枚  
賭勝遶屋爭馳哈哈拍掌自喜為奇不勾半月即汝死  
期天乎命乎神仙莫知汝未死頃名醫診視或云風邪  
或云癰子風不可必癰似有理至今思之不測所以汝  
善話言此際不語聲嘶氣斷張目而已環汝而泣汝淚  
亦泚嗚呼痛可忍言哉論世俗情女死何哭論我生年  
壯大窮獨汝又頗慧雖女亦足誰知鬼神虐我太酷先  
汝十日汝妹阿巽少汝二歲與汝同病同三日亡汝所



狎認今汝無伴當與妹並汝稍能行妹立未定往來攜手相好無競若逢汝姬可更一問父有室顧父有妣閔但往依之必汝提引所以權厝亦近顧側妹小汝攜汝小顧掖他年卜地葬汝同宅我今思汝不能去懷汝若有知常入夢來緣或未盡可再投胎所誦金剛併諸經呪設羹燔錢付汝領受汝見冥王操手哀叩儂實不壽儂實無咎儂生貧家儂甘麤陋糝粒必拾以畏雷吼孺履必惜以爬微垢神有誅求儂年實幼鬼有陵轢望神

為佑但可如是莫啼莫譁地府之中不比在家我今作  
丈汝不識字但呼阿震汝父在此哭汝一聲呼汝一次

文章辨體彙選卷七百五十三